

道古堂全集



和
976
8



門和16
新 276
8

道古堂文集卷三十八

狀 行狀

移志局理學名儒柴先生狀

先生姓柴氏名紹炳字虎臣晚號省軒先世自學士士
宗由汴徙杭著籍仁和祖祥明嘉靖丙辰進士江西道
監察御史父應權以明經爲興化學博卒於官先生自
闕遞父棺以歸特貧甚依伯兄紹然以居露濡霜降輒
踰蹠走墓門號哭松楸間里有父笞出亡者遇先生於
道譬之曰吾今欲求父杖難可得爾乃避乎爲賦遊子



遇孤兒行一章其人卒改悔爲孝子先生爲文師葛學使寅亮已入學宮爲弟子員與同里汪颯應撫謙陳廷會以古學相切厲雲閒陳人中時司理紹興見其文大加推獎爲序其青鳳集由是日益有名明社旣屋執友若吳公麟瑞劉公宗周倪公元璐黃公道周皆先後死國先生乃依東漢宋子浚等爲郭有道服心喪期年之例爲位哭於都亭遂棄諸生歸隱南屏業醫自給其學自天文輿地律歷典禮農田水利兵制賦役無不涉其崖畧而於音韻翻切尤精凡騷賦詩歌有韻之言穿穴佐證旁推交通一一指數其異同離合著古韻通八卷

其首辨沈約孫愐及宋禮部韻畧之沿流其次辨部第斷限并入聲部次異同其次辨全通半通閒通旁通之四例大旨謂古韻不立轉通古音不可妄叶古今韻有繁簡而聲文有遞變同時若崑山顧氏錢唐毛氏皆以音學之書名天下先生嘗掎摭其疵病寓書往復以救正之兩家無以難也又倣黃門顏氏例作家誡二十篇羣從子姓雖宦成歸里或年長於先生者朝夕繼見莫不索息屏氣肅若嚴君著省過錄明理論發明有宋五子之學康熙己酉 詔舉山林隱逸之士巡撫范忠貞公將薦之朝力辭乃已又請刻其所著書謙讓不敢自

道古堂文集卷三十八 九
信范歎息而止卒時年五十有五巡撫趙士麟督學王
揆檄所司祀之鄉賢明年葬西湖之花家圩學使周公
清原題其墓曰崇祀理學名儒省軒柴先生墓所著有
省軒文鈔十二卷通考纂畧十卷刊行省軒詩鈔二十
卷白石軒雜藁八卷切韻復古編四卷藏於家

刑部右侍郎王公行狀

曾祖某副榜貢生山西汾州府同知

祖某庠生贈通議大夫內閣學士

考某贈通議大夫內閣學士妣賈氏傅氏贈淑人繼

妣戴氏封淑人

本貫直隸河間府交河縣年五十八歲

公名蘭生字振聲一字坦齋幼端凝喜問學誦朱子易
本義不遺一字安溪李文貞公督學畿輔拔置縣學爲
諸生遂稟學焉益自刻厲研極性命之理自樂律音韻
旁及中西象數莫不深造從文貞公修朱子全書冥心

編校數學相長泊然於聲利榮祿之外者十有三年
聖祖仁皇帝問士於文貞文貞首以公薦 召直 內
廷晝日三接歲癸巳

命與舉人一體會試九月蒙養齋開局與編修纂事旋
以父病乞假歸丁憂方持重服 召赴熱河 行在復
以母病請急有

旨命將韻書帶回就家纂輯蓋異數也服闋復赴書局
日侍 講殿祇承 顧問辰入酉歸不間寒暑歲辛丑
試禮部不利

賜一體殿試以二甲第一名進士改庶吉士充武英殿

總裁纂修駢字類編子史精華是年冬

世宗憲皇帝嗣位以內廷近臣例邀 錫賚嗣散館授
翰林院編修雍正三年四月奉

旨凡諸館有律呂門目者俱著會同修纂旋

命署國子監司業事明年出典廣東鄉試爲正考官未
報實授司業俄有提督浙江學政之 命面乞便道省
親五年擢翰林院侍講六年轉侍讀七年晉侍讀學士
調安徽學政九年擢內閣學士兼禮部侍郎十年以安
徽學政復畱卽充江南鄉試正考官以學使典鄉闈前
此未有有之自公始復調陝西學政公清介絕俗苞苴

干謁不戒自遠愛士如子弟頒示文貞公遺書經說使諸生知所誦法凡奇才孤學通知陰陽歷術者必提掇獎成之故主三大省學政興賢育才鼓舞淹滯青衿組帶之士彬彬郁郁莫不願出門下迄今誦說不衰十三年以事挂吏議左遷少詹事

今上皇帝登極之初首蒙擢用卽補原官充乾隆元年殿試讀卷官旋充三禮館副總裁晉刑部右侍郎管禮部侍郎事三年二月二十二日隨駕奉安

山陵行次良鄉謁履親王於幄次爲具食飲談論如平時夜畱宿幄中明早肩輿卽路及午從者有所白憑伏

不能應履親王卽以上聞遽命太醫診視而公已不可復藥矣

聖心閔悼嗟歎者久之賜帑金五百兩命直隸督臣監護喪事停棺涿州以待家人奔赴焉公性畏慎周密出入禁闈二十餘年深爲

三朝所信遇科第皆出自

聖祖特恩一則曰王蘭生爲人正所學亦好再則曰王蘭生朕深知其學問

憲皇帝御宇十三年由庶常拔擢至卿貳今皇帝方隆重寄而年不躋中壽不得大其設施命也

操守廉潔俸祿之八半以給周親密友薄田數畝纔給
饘粥所居數椽不蔽風雨自列九卿未嘗有尺寸之益
宗支衰落一弟以哭公故逾時而歿繼母在堂年逾七
十哀公無子以族子誠繼公嗣承廕公學不爲泛濫其
於樂律如有神契朱子琴律圖說一篇字多譌謬公以
意詳正瞭然可曉文貞公用以進 御深被嘉賞入直
時恒得

聖祖指授本明道之說以人之中聲定黃鍾之管積黍
以驗之展轉生十二律皆與古法合又謂弦音祇爭長
短或用倍或用半其聲可以相應管音則有長短巨細

之差故有黃鍾積八倍者或四倍者而匏笙之管反有
用黃鍾積八分之一者至埙箎之類亦皆以黃鍾積實
加減而得其應聲蓋綫與綫體與體之比例異故也其
說稍變朱蔡而實與管子淮南之說合嘗謂世所傳等
韻書清濁未分元聲不辨邵子經世詳等而略韻顧氏
音學五書詳韻而略等皆未極其至及奉 勅編纂棄
短取長用 國書五字類爲聲音之元以定韻又用連
音爲紐均之法以定等書成

世宗賜名音韻闡微非大臣未嘗叨 賜焉他如律呂
正義數理精蘊卜筮精蘊凡與編校者皆一時之選至

律呂音韻必以公之論折中其學獨是莫知唯
聖君賢相君臣道合冥契於天人之際而公以一介儒
生參其間而承 恩顧可不謂難得之遇哉公娶於賀
儒學彭年女有三女二適士族一未字某與公先後入
館悉公之蘊畜重公之介特哀公之卒然以死而血胤
之無續也誠以公行事來告因綜次之如左謹狀

侍讀鄭公行狀

公姓鄭氏名江字璣尺晚號筠谷先世自唐時家於歙
後遷浦江是爲義門由浦江遷餘姚之眉山曾祖少南
以授經來錢唐娶於趙遂家焉祖應科父茂坤皆以公
貴贈儒林郎公生有異稟五歲時卽知以海參屬對山
藥九歲學爲詩未弱冠爲諸生試輒高等家遭回祿勢
中落藉教授以奉堂上之養得其歡心癸巳 萬壽特
恩開科以禮經魁其房是年試禮部不利畱京師學時
文於長洲何翰林焯主大司農華亭王公家分修詩書
兩經傳說彙纂戊戌成進士改庶常明年終養回籍旋

居父憂未嘗一飾筭牘干當事時高安朱文端公方撫浙不肯一往文端公以此見賞逮公服闋方補卽薦校順天鄉試徐尚書元夢教習庶常館試輒列公一等因奏充明史館纂修官是年以鄉試校閱公明議叙授檢討復丁母憂歸里巡撫李敏達公聘主敷文書院講席課士有法始分生童校試日期終日危坐堂上嚴絕代倩傳遞之弊頗有以賄求錄者痛斥之最激賞者周玉章吳嗣富陸秩胡際泰卽連掇科第以去錢唐龔鑑以經學見契於公公尤重其學行果以選拔出宰甘泉頗著惠政服闋入詞館大宗伯吳縣吳文恪公奏充 大

清一統志纂修官文恪卒大宗伯溧陽任公少宗伯桐城方公總裁志局少宗伯見公文深相折服因以志事見屬時纂修者雖衆獨公與常熟王侍御峻屬筆爲多壬子復分校京闈甲寅晉右春坊右贊善桐城相國薦公能爲古文

憲廟面諭有鄭江老實之旨乙卯爲典試事慎簡儒學之臣公在選同引 見者皆歷詢履歷至公獨不復問唯詢諸省文風孰優桐城相國以山左對卽命公往蓋受知有素矣公旣承

恩命矢竭公慎殫心校士非極荒謬者必閱至終篇援

道古堂文集卷三十八 行狀 八
筆點勘右腕幾脫竟以左筆終事搜剔落卷纖悉靡有遺憾闈中雖給事僕役莫不感歎試歸 恩命復使視學安徽躬親校閱標清真雅正之文爲正鵠險詭者概從斥落風習爲之一變嘗謂入泮爲士子進身之始前茅廩餼所關敢不盡心乎檄州縣以廩餼對抵錢糧無糧者爲任親友抵納免出入耗折之患遇有案牘尤畱心究切青陽有娶未婚族孀之武生已廉其實縣令再三請貸卒治其罪而離其昏盱貽袁生以祖任縣令時後官擔代銀兩與制府有私親檄州牧褫其衿公捐俸率錢代償而袁生不果黜巢縣監生樊珍以爭產誣其

弟婦單氏及已昏姪女樊氏與隣人趙生通公閱牘而疑之下縣縣令受樊珍珠實其事通姦無所據惟以樊氏所執詩扇爲證佐則趙生所書唐人句也蓋趙生與單氏子兆賓同學是夏趙生書此扇單氏母女偶執之實無他公以縣審不實駁之督撫檄無爲州牧覆審州牧前嘗以私書瀆公因私憾欲妄褫一生公不答而下府平反其事因是與公有隙欲借以傾公謗公受兆賓賄逮公役往質太守意不直之而公心跡始白然單氏母女之寃猶未白也公按試至廬力左之復言之撫軍先後兩臬司皆與公意合其事得釋而樊氏之舅諸生

陳案因欲出樊氏公檄至面諭之得以完聚使節所泣
凡名德之後貧弱不克自振者必委曲成全之諸生通
古學者尤引進不倦陶敬信之通經江有龍之史學皆
特疏薦於 朝有龍以親老辭敬信獻所著書 闕下
與修三禮人皆服公之能知人也秩滿晉侍讀 召對
詢以方面大吏及所過地方情形次及江左人文屢蒙
溫諭仍充明史綱目館纂修官公在江北時池州各屬
地苦卑濕一雨則堂室皆水苔愔愔生榻上公久坐蒸
濕中迨反 命冒暑載馳熱雨蒸爍居一年足遂不良
於行乞告回籍調理掌院固留公且欲借修書爲公養

疾之地公以食祿不朝賀非臣子禮力辭歸同館諸公
祖帳都門外人賦一詩贈行數十年僅事也公所學無
不貫尤邃於經謂春秋爲宣聖性命之文而三傳未能
發明非啖趙孫劉諸大儒則聖經或幾乎晦武夷胡氏
頗以己意武斷迂泛不切者不可殫述晚集諸家之說
爲春秋集義二十卷穿穴根據不第爲胡氏諍臣也又
爲詩經集詁四卷禮記集注二卷與修明史時有明志
稿六卷明太祖本紀八卷列傳十卷修綱目時有明綱
目三卷少學詩於同里洪稗畦中凡數變卒歸醇雅晚
與里中諸宿老結南屏之社而公獨絕去破碎嵬瑣之

習已刻筠谷詩鈔七卷余嘗承公命爲之序未刻者有
書帶草堂詩鈔三十三卷文集八卷賦四六共一卷詞
一卷其他若析醒錄三卷粵東紀遊一卷則公之雜著
也公和而介通而有守官庶常時修冢宰方摠庶政同
年薦公入幕不就或嗤其迂已而修敗友人獲交于年
太保爲公先容勸作詩以頌功德笑而不應方侍郎薦
公於果邸公力辭西林相國會薦公肇高雷廉學政終
未嘗私謁通名仍用後輩禮不敢妄附門生之籍身旣
通貴布衣之交四十年如一日後進有雋才折行輩接
之稱說不去口余之交於公也時方踰冠而公已爲巨

人長德歡然握手若昆弟暨余通籍而公又爲館中前
輩片言之美一字之疑虛已下詢執禮如末學小生而
不知涓流之不可以益河海撮土之不可以加泰山也
公子之翀特令執經余門公旣彌留而之翀會試在京
師遺言必乞余一言定公生平之行狀嗚呼余爲荒廢
頹落之人公獨略去勢分而有所取焉豈非以其質正
而不肯阿所好乎公疽發於頸血氣漸耗屢下不止疾
旣亟尙索紙作買棺寫真二詩比至屬續神明不亂蓋
其養有素也公生於康熙壬戌二月二十六日終於乾
隆乙丑二月二十九日春秋六十有四

勅授文林郎再授儒林郎例授奉直大夫公之階也娶於陳封孺人例晉安人男子子三長卽之翀乾隆辛酉舉人次之莊次之開繼弟明彥爲後女子子一適太學生傅庭芝明彥遺一女公撫之如已出亦嫁士族太歲在丙寅子月晦之翀將葬公於桃源嶺青芝塢之原幽宮之銘伐石有待匍匐稽顙件繫行事丐余筆授以竟先人之志是不可辭也謹狀

涿州知州許君行狀

曾祖考可元歙縣歲貢生

祖考得全歙縣廩生

考琮江寧歲貢生封承德郎

今天子紀號之元載起潛震蟄收擢才儁與之更始前涿州守汪寧許君家居者蓋六年矣踊躍

聖化走京師投狀請自效執法司憲之重臣察其辭直俾得覲見

天子有日無何許君適以疾告越明年竟卒邸舍其孤天成將以喪歸匍匐余庭口述先人遺事請爲行狀狀

日君諱恒字司貞號北山系出唐忠臣遠後世居徽州歙縣之許村自君封公宗玉公始遷江寧遂爲江寧人宗玉公娶余太君生丈夫子二人繼室程太君又舉子二君其第三子也幼而岐嶷端厚不佻及長性識練達措意經世之務入太學循例謁選人授江西建昌府通判甫蒞任值南安府砂夫梗化兇鋒方熾往救捕者輒爲所挫撫軍廉君才俾率兵士進剿君以計攜其黨乘其怠擊之旬日而平未幾府治城鄉同日蛟發水湧十數丈遭漂溺者呼號徹聽君亟命人吏恣與之金不問安人翁亦徹環瑱以助招徠舟人得船大小九十餘艘

救回漂流者四百二十餘人生全者三千餘口渡送天一山葢茅安處炊糜給廩民得恃以全活水退更爲修葺廬舍復獲安堵康熙五十七年調判湖南永州檄赴長沙執季執季者當時所定之名於府佐中擇一二賢員以當司臬臂指之使者也君天性豈弟能盡心於庶獄七府二州填牢戶籍以開釋者不可僕數而匿名爭水兩重獄尤倚君以全妖僧有爲背逆帖子者揭于通衢索其人不獲撫軍怒甚飭長沙善化二令必訪致之城僧千衆皆坐幽繫敲朴無虛日君謁軍門請以身肩其獄日就僧鑿辨辭色卽於衆中得造謀者千僧一時

道古堂文集卷三十八
盡脫桎梏泣爲許使君立主尸祝諸寺至今不衰五十九年攝善化縣事歸塘李陳兩姓以爭水利致殺人禁囹圄者六十餘人案懸七年不結瘐死者七人矣文書盈尺君用情閱實寢不脅席者兩晝夜庭引諸囚謂之曰獄有首有從律有矜有疑若以鬪鬪細故株連蔓衍至數年不解父母妻子皆日引領生還但得一人首服其事卽冰釋矧就坐尚有矜全之路耶余爲民上誠不忍效前事者濫刑懾汝伏蓋自陳乎爲之歔歔掩泣淚沈瀾几案閒衆囚感動慷慨引伏盡得其狀收其兇首餘並請於軍門開圜扉而縱之兩村父老焚香踵門祝

使君長壽者走數十里不絕雍正三年兼攝府事本屬江華永明道等州縣地界苗疆跳刀走戟閒有竊發君草上移鎮駐兵彈壓巡防之議不果行後卒有荆之寶之變始移兵駐守如所議六年銅斤解京例得引見憲皇帝諭旨褒嘉晉任順天府涿州知州十二月十九日朝於乾清宮跪請
聖訓溫綸勉勵至數千言有香貂珍藥乳茶克食之賜恩遇稠疊君益感勉奮發治涿未匝月循聲四播俄以前在湖南時屬員有諱盜者牽連及君
上置不問以北南大道夏秋積水爲行旅者所畏發帑

修塾在君境內者部定修寬二丈君更增廣五尺皆解私橐爲之蓋藉此以仰荅

知遇而督臣不察猥以違制累民挂君吏議而君遂自此解組歸矣君服官三十年勤勞在職殫厥心膂凡四督漕運一護京餉一解銅斤一送軍糈抵紫荆關在建昌攝縣事者三曰宜黃曰新建曰新城攝府事者一曰吉安在永州攝縣事者二曰善化曰零陵兼攝府事及郴州皆以興學校課農桑鋤奸振滯宣導 聖化爲要務修建橋梁民不病涉今宜黃之通濟石橋及永州西門之浮橋皆君所創也君至性友悌初服官先人田宅

卽推與弱弟歸田後空囊不名一錢假屋而居日事影質口不言析產事晚歲築室鳳皇臺左授書諸孫與人樂易無疾言遠色束帶終日家人儼若嚴賓爲鄉里所取則君生於康熙八年某月日卒於乾隆二年某月日春秋六十有八娶於翁同縣明經象賢公女 覃恩封安人先君十年卒子男二天成天一天成娶於如臯高氏天一娶於上元譚氏天一先君早卒女子子一嫁海寧陳克敏孫男一慤余之託襟契於君也從君族弟端余重君老成貞淳敦樸之氣襲余懷而不能釋且以天成之爲能嗣君并欲傳君是不可以辭也謹狀

朱秋圃先生行狀

先生名元文初名允文字開武號秋圃系出山陰史氏
五世祖愛洲公來遷於杭遂爲仁和人曾祖恒度公蒙
外家姓乃以朱爲氏氏朱者訖先生凡四世先生生有
異稟垂髫爲文操管立就凌紙恠發雖大師耆儒往往
爲所驚懾天性悅學功苦非人所能明而動燭入不肯
休倦矧不支繫髮於枕轉側卽覺十年以爲常 國家
既定舟山改舊昌國州爲定海時學校初立青衿錦帶
皆樸遯不任俎豆招徠他邑士任開墾者得隸籍楚黃
張侍講希良故出固陵毛檢討門號稱知人能得士先

進古堂文集卷三十一
其
生航海應召褒爲選首嗣後四方文士輻湊其邑高才
生多出其中定雖新邑文學乃與勾甬諸大縣甲乙爭
長而先生屆試必往往輒傾其曹偶一郡士皆側目夫
士入黌舍挾徑尺之書守一先生之學餼虞庠之米廩
則峩冠濶步矜號名碩此柳子厚所以致誚於黔驢而
太史公所謂夜郎王不知漢廣大者也先生深用爲耻
厚自抑損精學家巷杜門簡交游教授諸生咸有程法
其致力也深以果蓋有異於世之號爲經儒者南陽彭
侍講始搏禹峰先生冢嗣也博瞻爲詞館所推挹視學
澗河意欲得淹洽閎麗之文樹之正鵠以振時習之空

陋手先生文循諷以號于衆亟曰國士國士庭中人熟
視屏氣無敢譁者刊其文以爲矜式朝傳夕徧不脛而
走大江南北莫不以能文者名朱先生吳中何翰林焯
持文律甚嚴所掎摭不避權力制舉士所謂龍門也還
淳方先生棨如邃於經術以名進士令豐潤罷畱京師
昕夕過何數士及浙省何舉金虞方稱先生當之何曰
奚似曰似西安方孟旋雖然以沈實則孟旋不似也旣
而臨川李侍郎來主秋試先生名在薦中不及錄歸而
翰林往訊曰君其得金虞而失朱某則是役也功與過
讐歲辛丑充貢詣京師橫翔捷出譽滿太學劉司成師

恕沈司業翼機交相推重謂六堂課第不宜以第二流處是生歲丙午晉江陳詹事萬策典浙省試事先生兩試京兆皆不遇困而歸歸益鏃厲爲學行文高壯廣厚益醇以肆嘉興令程君屏山見其文驚詫絕異亟以第一人薦榜旣定名在第八詹事曰余非抑置是生也曩者余嘗以是魁閩省使衣鉢可傳吾且屬之矣大凡先生之文知者或愛之入骨髓掉之以輕心或望洋而不得其涯試于庠序學校必求其位置之地環覽雜誦味乃如炙車轂而愈出鎖闥而易書目眵唇燥煩昏鬱悶之餘或且覲面而失之以故提筆入鄉闈失十而得一

來禮部試三薦三不見收此果時命主之耶今年春上海朱翰林良裘得先生卷嘆以爲今士寡雙而主司不見省先生無幾微尤憾俶裝亟歸歸八日卽病病八日以歿嗚呼昌其文而晦其遇天之待先生者薄歟抑其厚之也先生之教人也巽而善入一節之長擊賞不置口或怠于學至流涕相告誡經其指授莫不得氣以去掇科第者如拾地芥其他爲學官弟子者尚數十人余年弱冠猶隨諸童子試有司遊先生之門得盡讀兩京以上之書每一文出先生恒詡于人曰浙固才士淵藪後生英絕領襲之者乃出我門下余固知先生蓋過爲

獎借之辭乃其所以不敢暴棄者亦以此先生之論文也與俗師異曰人亦有言曰絢爛歸于平淡此殆爲才餒學儉者解慙也古有絢爛之文無平淡之文今人不知乃取其所絕不經意者而以爲絢爛之所歸是直爲自便之計而實不見古人左氏負浮誇之目莊周有荒唐之鳴賦家以沈博絕麗見稱史才以文瞻事詳爲貴唐之謚文者有三曰韓曰白曰權類皆磅礴鬱積怪竒偉麗以恢廓其議論未有柔聲鼻骨而卒能名世者宋儒可與說書難與持變聞者驚怖其言而卒無以難之爲文不妄下筆每獲一義鏗而不舍必曲折詳達以盡

其隱立言蘄爲可傳能傳之者在其後人而先生未嘗自表襮也先生事親孝與人信不爲譎諭之行介而有守方大母在堂尊人客遊京師曲致甘脆之奉補衣惡食卑居徒步自待未嘗踰侈親串以急告藥石之資棺槨之費傾囊橐與之無難色其篤于古處類如此生于某年月日歿于某年月日年五十有八娶某氏有子曰庭芝能世其學以余從先生有年能悉先生行事千里緘書走使來告曰昔宋濂能傳吳立夫而黃楚望之行狀出自趙汭先君子學成而業未竟微子辭則恐其勿有耀也是不可以已訃旣告門下士畱京師者戴章甫

陸嘉穎陸秩陸宗楷孫廷槐周贊爲位于僧寺設奠望
祭行哭失聲退而駿乃序次先生所爲可傳者以慰其
孤以告世之不盡知先生者謹述

道古堂文集卷三十九

仁和 杭世駿 大宗撰

碑

資政大夫都察院左都御史贈禮部尚書太子少
傅諡端恪沈公神道碑銘

雍正五年冬都御史錢唐沈公以疾薨於位

上聞震悼身後之典有加命王大臣致奠 賜帑金

勅吏部官爲經紀喪事加贈禮部尚書太子少傅 賜

諡端恪給祭葬如例

御製碑文榮哀兼至其仲子遷奉公喪歸卜葬於歸安

進學堂集卷三十一
縣埭溪之新阡徧乞墓銘誌傳於鉅人長者以光顯先人之行業駿於公爲鄉里後進少嘗以文字見知於公知公之行誼最悉非其文足以致公不朽公有其不朽者文或藉以傳焉謹按事狀公諱近思字闡齋號位山又號俟軒世爲仁和之五杭村人曾祖學顏祖時吉父大震皆以公貴贈資政大夫吏部右侍郎妣皆贈夫人曾祖母尤矢節撫孤孫避兵旤艱瘁彌厲以故贈君終身無笑容公少而夙成年七歲請於父曰仁爲何物贈君大竒之九歲喪父哀毀若成人少長從虞山錢燦嚴虞惇學補錢唐學官弟子公之以錢唐著望自此也假

學舍授諸生經厲志求聖賢之學曰人欲窮理必自六經孔孟始讀六經孔孟自集註始欲修行自敦倫始敦倫自力行小學始坐右書伊川涵養須用敬進學在致知語自警康熙己卯領鄉薦明年成進士時座主孝感相國將致政歸公上書論孔廟前此從祀於道統正傳有未當者其略云孔子之道至朱子而大明朱子爲繼述孔子之大宗同乎朱子者卽同乎孔子也異乎朱子者卽異乎孔子也及明嘉靖以後與朱子岐途異軌者亦並從祀其時因功業之高聲名之盛又以門人徧滿附和者多遂至謬誤相沿習焉不察使千聖相傳心法

道古堂文集卷三十九
二
如精一之旨博約之訓知行之序誠敬之功若有不由
其途而可入聖者此大惑也因極論當湖陸稼書侍御
學術純正宜膺祀典孝感深躋其言後侍御竟列從祀
其論自公發之家故貧惟一僮執役謁選授河南臨潁
令不改素操單車蒞職修倉建社豐凶有備役夫築孔
家口堤潁人至今無水患立岳忠武于忠肅雙忠祠修
宋統制楊再興墓自爲碑記以率勵廉耻敦厚風俗爲
本務膺循卓薦去潁之日士吏攀車灑泣道不得行擢
廣西南寧府同知執法不避權貴豪吏斂手未幾以病
乞歸集生徒教授如初豫章敷文兩書院來聘主講皆

辭不就相國高安公撫浙時以賢能薦監督清河本裕
倉嚴立規條搜剔奸蠹積弊一清未兩月浙閩督臣來
請以公攝臺灣府事

聖祖仁皇帝可其奏卽命公往時臺灣逆亂初平方資
撫輯因作遠慮四論略云臺灣爲沿海諸省保障鹿耳
天險澎湖孤懸非若內地之可以臂指使也以二千里
之幅員止設三縣聚一二百萬無家室妻子剽悍狼戾
之徒肆行其輕詭任俠之習地方之敝由此而起莫若
取臺灣析爲數縣俾各治其地每縣中各分都畝保甲
統領約束絲連繩貫易於稽察一道一鎮彈壓府治駐

道古堂文集卷二十九
兵三千游守千把分防各縣又取民壯之材勇過人者
拔置行伍嚴加操練迨兵多之後潛移內地以充各標
其餘流雜之民必審其籍貫稽其家口方許授田土否
則悉驅過洋自可化頑暴爲淳良變海島爲禮義矣當
時採其議行之

憲皇帝初卽位向聞公名 召授吏部文選司郎中時
銓法久亂胥吏多假手爲姦公密察輿論盡得其隱吏
不敢欺由是宿弊頓絕旋晉職太僕寺卿明年典山東
鄉試未竣事超授吏部右侍郎山西撫臣方上耗羨歸
公之議

上將從其請公力爭殿陛間同列皆爲失色
上嘉其誠剴不之責也方是時公直諫聲震天下丙午
主江南試 陛辭之日 御賜詩有操比寒潭潔心同
秋月明之句明年春晉都察院左都御史總裁禮闈得
士稱盛公受
聖主知遇至深不五年間自散吏擢至九卿日夜淬厲
殫竭思慮凡 國家大計知無不言言無不盡前後封
事十餘上皆剴切明白不爲苟應故事每封疏將入必
先期宿戒鍵戶沈思繕稿竟北嚮叩首而後行雖家人
莫知所陳何事海內識與不識朝夕顙望希公枋用卓

然大有爲於天下而天靳其年不得竟其所用是冬邁
疾卒於位年五十有七公慎交游寡言笑學以程朱爲
準的與儀封張清恪公講性命之學清恪公所著學庸
講義皆與公往復辨論而後成生平敬李梅崖之道義
蔡梁村之理學晚歲篤好稼書文集與閩人雷鉉王道
考訂其業夜分不休所著述數十卷曰學易學詩讀論
語注偶見錄小學咏勵志雜錄真味詩錄天鑒堂詩文
集皆理道之言銘曰
元氣塊北坤厚寧曲江迴折濤瀾生嶢嶢大儒天挺英
樹立匪祇一世名蚤從小邑流惠聲力振弊劫扶孱僇

築堤捍患潁水澄東人泣送西歡迎旄頭夜墮赤嵌城
卓然遠慮推用兵坐可危論起卽行

帝憂銓法俾掌衡從事認詞莫敢窺逆鱗不憚徑寸撓
竝諍侃侃殷殿薨

帝原其戇嘉乃誠南牀獨坐望匪輕圓首躋足跂治平
胡不慙遺末疾嬰翩騎箕尾邀太清茗水嗚咽繞賜塋
羊馬躑躅樂石貞維公孔思兼周情氣奪喑啞驚聾盲
執朱之奧抉陸精繼宋五子張周程儒術彪炳辭鉤鏗
銘詩徵實不可更

通奉大夫工部右侍郎喬公神道碑銘

雍正十有三年正月三日少司空喬公以疾薨于位年
僅五十越六月其孤大元等將返葬于其鄉撰次行狀
千里走使來求麗牲之碑謹按公諱世臣字丹葵號蓼
圃自曾太父南泉公始從泗水遷濟寧王考景進考發
皆爲儒不仕公以康熙五十九年舉山東鄉試第一明
年成進士改庶吉士

今天子御極之歲散館授檢討充明史館纂修官三年
改吏部郎中是年八月奉 旨閱視保定城工自九月
以迄明年四月凡再賑武清饑一刷侵牟冒給之習會

道古堂文集卷三十九
六
縣令輸米偶不繼餓者洵籍公以便宜借貯穀給之
天子以爲能晉階二級卽令出知嘉興府事尋丁父憂
服闋補杭州知府復遭祖母朱太夫人喪承重持服假
四月復起視事遂護理浙江按察使事旋 命署理江
蘇按察使未半歲卽真公所至有惠政而聰辨彊毅發
奸摘伏不可豪髮舉民以爲神九年晉通政使司右通
政署理江蘇巡撫事務江蘇備儲倉糧較各省獨少乃
奏請依雍正五年定例大小中縣皆令積貯米穀出陳
易新民食旣足緩急可恃京口駐防兵丁向無存貯銀
兩惟恃蘇州藩庫調發相距稍遠動淹時日乃請撥八

旗倉米折價銀二萬兩豫存鎮江府庫以待不時又以
各省提鎮駐劄之地多有與會城隔遠者并請計鎮兵
多寡量撥藩司存庫之銀近寄守牧並得 俞允是年
冬晉都察院右僉都御史實授江蘇巡撫松江海塘自
金山至華山角凡四十里最爲險要自雍正二年今相
國高安公奉 旨修勘別築塘基易土爲石而華家角
至黃家灣二百一十餘里土塘少薄颶風發作其地每
先受患又黃家灣以北至寶山土塘頽廢旣久潮患尤
甚公親相度形勢鳩工興築高下廣狹因地制宜捍海
之塘迄今無患他若謹斥堠飭營堡開鎮江支河濬無

錫城河起事興衆動爲民利皆有刻石茲不備書十一年七月 特召還京晉都察院右副都御史兼理工部侍郎事逾月晉刑部左侍郎仍兼工部十二年七月以疾請假 上遣御醫二人診視稍痊復力疾省事十月調工部右侍郎疾復作遂不起公內行純至仕臻牧守兩遭大故哀毀骨立淚如灌霤上有一兄不幸蚤世葬歛盡禮撫其孤逾已出自少嗜學經根史祗追探元本與修明史時嘗爲叢目若干卷旋移曹郎中輟爲文援筆立就雄深渾灑兼同父華父之勝遇事廉勁峭厲不

以利害回疚其孤狀稱不沽名不市恩門無私謁家無

餘貲蓋實錄也公娶於程處士美公女子二大元大愷皆太學生女二長適阮次字張今年某月日葬公於某原銘曰

邾婁舊城碣礫古津川盤山鬱氣鍾偉人官從蓬山繼剖符竹執憲慎罰不教而肅行臺旣立銀印紫綬王之喉舌勾吳建牙爲士轉餉爲民足食捍海築塘恩比溟渤 帝嘉汝臣汝貳司空兼折庶獄作朕股肱奔走二職瘁於 王事醫師實來藥對罔治觥觥我公道冠百卿通儒良史大猷是經梁竦七序劉迅六說鴻筆陶冶世秉科律騎箕躡尾將歸故都清白而終不遺其孤文

寶明山之原來乞碑銘按狀公諱俊字慧先號鵲峰宋
端明殿學士諱若者始居湖州歸安縣之射邨繼遷郡
城南道場山曾祖考某祖考某考永瀾均以公貴 贈
榮祿大夫昭勇將軍公少有大志上世皆以文學名而
公獨用武功顯既成進士出居庸並塞垣西至右衛歷
覽山川阨塞道紫荆而歸每與賓從燕談洞如指掌窮
日夕不厭也初授溫州鎮標中營遊擊繼調河標左營
晉嚴州協鎮副將積功至福建福寧鎮總兵官溫州負
山倚海賊王大順等出沒海上爲民害公設方略招之
卒就撫餘黨解散比歲大稔米價踊貴溫人聳懼公請

于督撫凡商人由海運赴閩者悉遮畱之民食遂裕河
標駐營濟寧餉米敗惡不堪食兵以爲苦前事者遵例
不敢同異公申請改給自買利貽至今兵貧有不能備
衣甲者出錢資助之士氣爲之一新
聖祖閱視河工顧見所部嚴整垂問姓名遂蒙知遇嚴
州山水暴至漂沒廬舍沈溺者不可勝紀公懸重賞募
舟數十濟之凡活數千人去嚴之日嚴人繪攀轅圖
以進爲樹碑于峴山之陽立石本郡稱僅事云福寧婦
女有茶會相約結羣聚遊戲迭爲主賓公力禁之懲其
夫男俗爲衰止州南隅長溪水自萬山中出迅疾湍悍

舊有橋名太平歲久而圯公爲重新之民不病涉臺灣
事起公方病暑臥聞警力疾起治兵事發卒詣廈門以
資聲援親視海口諸汛颶風陡作舟幾覆者數矣幸而
獲濟遂得嘔疾公長身豐髯兼資文武書法文董爲詩
操筆力就相國李文貞公許其熟於聲病精於律切所
著玉樹堂艸甌魯詩存可覆也奉命制府編輯兵書分
閱操督戰陣法兵械爲四卷立可施設人謂戚繼光俞
大猷不能過也公生於順治丙申某月日薨於雍正癸
卯某月日年六十有八配顧夫人子男四人啟昭歲貢
生卽我衡之父也顧夫人出先公卒岱昭泗昭建昭皆

側室沈氏出公旣歿三孤尚幼我衡官戶部員外郎翼
之以至於長泗昭今成進士銘曰

弁峰嶷嵬茗水清利蘊靈坤輿誕產國器馴以虎韜施
此猿臂蔚爲儒風專闢攸寄甫莅東甌化剛爲柔豺獠
封狼負嵎魚然一矢不遺卒抗其首礪礪徒營釣臺弭
節水無溺人士不艱食

帝嘉乃庸喜見顏色建牙海疆化行其鄉菰寮菁廠流
人俯張畏公嚴重孰能不臧潢池弄兵勞我撻伐飽帆
高張破浪爰發風伯肆饕朋比海若震驚我師幾不得
脫恃公福星重險斯拔自公之生際時永清鷹揚橫海

隱然長城暨公之死素車北指一弓墮號龍轡殊駛秉
馭不迷

帝心用淒封其高冢與菁山齊豐碑屹屹俾無顛隳公
後宜熾有孫繩武謂我知公揭銘於墓我銘不誣 國
史可補鐫公兵謀照耀千古

番禺陳氏墓碑

君諱達字世榮號南軒姓陳氏望出潁川其章於少牒
者不可僂數也番禺之陳顯於明戶部尚書南莊公世
居縣鄙沙灣司之沙頭墟君其十世孫也考曰雲霖公
生四子君其季也世以儒業相嬗而君不樂進取布衣
散帶養真衡門娶於關有五丈夫子曰宗仁宗智宗信
宗岳宗廣其生也以永樂癸卯四月二十有八日其卒
也以成化丙 七月十有四日某年月日合葬於欖山
堡白水塘之果合岡歲日綿邈公琴墜落桓楹翳如乾
隆亥默涖灘之歲筮龜襲吉馬鬣更封裔孫大維等來

乞銘其辭曰

番禺東鄙沙頭墟有媯華裔奠厥居大農衍澤十世餘
禮畊義耨敷經腴公才觥觥世所須抱玉不售潛菰蘆
偕隱喜有同牢俱五丈夫子追商瞿老終牖下保令譽
攬山犖确白水紆蒼栝偃蹇長松癯更四百載擴遠圖
攘剔菅蒯驅黽跑旣旣堅好蜃蛤鋪廣輪儼覆夏屋如
霜寒水涸用力劬脩墓竊比五父衢 聖皇紀號十七
書荆焯襲吉龜兆孚斷手壯月暨訖涂誰其銘者列仙
儒鴻詞撫實絕險膚大書深刻筆力麤豐碑不用龜承
跌義取彰信綿居諸九京有知幽噫扞林深月黑風舒

舒永妥窀穸無後虞

道古堂文集卷四十

仁和 杭世駿 大宗撰

墓誌銘

胡東樵先生墓誌銘

乾隆二十有四年清溪胡翰林彥穎將于十有一月癸丑葬其王父東樵先生於經南圩之阡至是距先生之歿蓋四十有二年矣有唐杜甫旅卒岳陽子宗武病不克葬而以屬其子嗣業歷四十餘年而乃克竟先人之志遷祔偃師彥穎焦勞晝夜過時而卒妥先生于幽故有合于元氏之所歎於嗣業者亮其遇而不責其慢君

Blank page with vertical lines, likely a separator or a page with very faint text.

子有怨辭焉按狀先生名渭初名渭生字拙明東樵其
晚年自號也胡氏籍隸餘姚先世諱子中者始遷德清
曾祖友信隆慶戊辰進士廣東順德令有名于時事載
明史祖子益諸生考公角天啟甲子舉人先生生十二
年而孤母沈孺人挈先生避寇山谷閒歸則牖戶漂搖
草竊猶充斥有田數十頃在遠鄉租船至中途輒被劫
掠乃鬻負郭之田以完賦家遂赤貧年十五遊于庠試
高等爲增廣生高文遠俗連不得志于有司乃入太學
館益都相國所

聖祖側席方聞有道之士復唐宋博學鴻詞之科相國

欲以先生應 詔堅辭不肯就羣公避嫌以相國子師
莫敢先發及見薦牘無先生名則又大驚先生自是遂
絕意科舉之學專窮經義崑山徐大司寇乾學總裁一
統志假歸許以書局自隨禮延太原閻若璩無錫顧祖
禹常熟黃儀洎先生與修開館莫釐峯下因得縱觀天
下郡國之書凡與禹貢山川疆域相涉者隨手鈔集與
經文比次以酈元水經注疏其下酈注所闕凡古今載
籍之言苟有當于禹貢必備錄之依經立解章別句從
歷三碁後成名曰錐指其於導河一章辨析尤至謂後
世河日徙而南則究之西北界不可得詳河南之濟亡

則究之東南界亦苦難辨華陽專主商洛則梁之西北
界茫無畔岸黑水與雍通波則梁之西南界何所止極
研精覃思博稽圖籍手摹圖四十七篇凡九州之形勢
及古今郡國地名之所在八方相距之遠近大畧粗具
海寧查學士昇以先生書上進 法駕南巡先生撰平
成頌一篇并前書詣獻 行在

上深嘉歎宣至南書房直廬 賜饌 賜御書詩扇

賜耆年篤學四大字稽古之榮近代儒者或未逮也雖
指既成他經以漸次及謂詩書禮春秋皆不可以無圖
唯易則無所用圖六十四卦二體六爻之畫卽其圖矣

其卦之次序方位則乾坤三索出震齊巽二章盡之矣
圖可也安得有先天後天之別河圖之象自古無傳從
何擬議洛書之文見于洪範五行九宮初不爲易而設
作易圖明辨謂漢儒專主災異以瞽史矯誣之說亂彝
倫攸敘之經害一洛書之本文具在洪範宋儒乃創爲
黑白之點方員之體九十之位且謂範之理可通于易
劉牧以九位爲河圖十位爲洛書蔡元定兩易其名害
二洪範元無錯簡宋儒任意改竄移庶徵王省惟歲以
下爲五紀之傳移皇極斂時五福至其作汝用咎及三
德惟辟作福以下並爲五福六極之傳害三辨誤析疑

作洪範正論大學一書朱子作章句後諸儒皆以補傳
爲疑先生以經文此謂知本二句當在止於信之下知
本蓋知止之譌格物致知與至善釋在邦畿章內元無
闕文無待于補作大學翼真太歲在甲午正月九日考
終牖下春秋八十有二配黃氏諸生幼良女子四人方
騰出繼大宗山西大同令贈先生如其官調陵川方質
方威諸生方詮女二人適游擊沈運桂諸生沈益新孫
十人彥穎翰林院編修勳山東臨淄令彥輔貴州清平
令彥昇由額外主事改授山東定陶令彥平彥冲蚤卒
彥藹彥博彥韜彥肅皆諸生曾孫十餘人元孫二人銘

曰

學猶殖也經爲之根非別黑白孰定一尊苟學不醇經
義終晦羣言紛囋不鄙則倍清溪縈紆四水交趨織簾
而後篤生真儒於惟尚書有體有要陳疇制貢厥義孔
奧竹素散逸夏傳不傳搜析精微能執聖權抉摘河洛
綜貫大學游情三古覺彼後覺耆年篤學聲徹九重
天章巍煌由稽古隆其人雖亡其精則存墓櫃後彫
漆燈不昏剖碑埋幽以表經術讓德考行視此信筆

光祿大夫太子太傅東閣大學士兼禮部尚書加
贈少傅文穆徐公墓誌銘代
乾隆九年太子太傅相國徐公以疾在告越四年薨於
錢唐里第遺疏上聞
聖心震悼賻贈有加 諭祭葬如典禮三祥載周公子
以炬等筮藏協吉走使乞銘余與公同朝久又同入
內直同贊軍機晨夕繼見情好殷摯誼不可以辭也按
狀公諱本字立人別字是齋徐氏系出河南徙錢唐者
自公十世祖克敬公始四傳至龍山公諱灝中正德辛
巳進士歷禮部儀制司郎中以抗節忤時宰出知江西

臨江府高祖諱守桂曾祖諱曰隆祖考諱欽安皆以公
考文敬公貴 誥贈光祿大夫 經筵講官吏部尚書
高祖妣屠氏曾祖妣童氏費氏祖妣王氏皆累贈一品
夫人考諱潮號浩軒康熙癸丑進士 誥授光祿大夫
經筵日講起居注官吏部尚書兼管翰林院掌院學
士事 賜諡文敬妣及氏 誥贈一品夫人繼妣及氏
誥封一品夫人自曾祖考以下復以公貴加贈如公
官公爲文敬公長子與今宗人府府丞杞同出自繼妣
及太夫人公生有異稟言笑不苟成童卽爲諸生弱冠
中副榜充國子貢生康熙五十二年癸巳

聖祖仁皇帝萬壽特開恩科公以是年舉於鄉越六年
戊戌成進士改庶吉士散館授編修入直 武英殿分
纂子史精華駢字類編充政治典訓纂修官
世宗憲皇帝踐阼與修

聖祖實錄旋以原銜充 日講起居注官分校順天鄉
闈奉 命視貴州學政未就道晉左春坊左贊善尋轉
翰林院侍讀化行荒徼風氣丕變

世宗廉公可大任卽其地轉公爲廉使明年調江蘇不
數月晉湖北布政使又明年卽有填撫安慶之 命安
省瀕河環山宿毫之間向號萑苻公至廣設偵邏嚴別

緝比沿江塘汛一百七十有七至是增備塘船至二百
有奇探丸無所容跡壽州積盜有孫平焦鄧數姓假捕
魚爲業濱河聚族而居莫能窮其出沒公密檄廬鳳道
李如蘭以計誘之悉擒以獻坐其渠魁河濱漁舟編列
甲乙使互相舉發立族正以糾之盜藪爲之一清公爲
政有體要不事苛燒與民休息而民安之以是深愜
聖心越一年 丙召爲左都御史未及還 朝卽 命
蒞浙讞江山獄江山王益善者素無賴妄覬揭竿號衆
事發牽逮及兩省人心悚惑不知所屆公至詳核情罪
置爲首者十餘人於法餘悉輕重當其罪一切勿引蔓

計所全活凡千餘人乃會督臣奏請衢州一府南聯福
建北接江南東通金嚴西達江西踞浙上游爲三省門
戶其閒崇山密箐深源曠土最易藏姦請將衢協副將
改爲總兵官以資彈壓又金衢嚴三府幅幘甚廣棚民
雜處姦良不一請復設分巡金衢嚴道一員駐劄衢州
府城又江山縣之青湖鎮南界閩省浦城縣崇山峻嶺
爲兩省行旅必經之道其適中之地則爲峽口再東則
爲念七都路徑更窄樹木叢茂復有小路可以直達仙
霞嶺之後請添設同知一員分防青湖峽口仙霞等處
駐劄峽口凡此皆所以消伏莽之釁清奸宄之源處置

周密悉荷 俞允旋以原銜充 經筵講官晉工部尚
書協辦大學士事務充校對 三朝實錄 皇清文穎
兩館總裁官兼理都察院左都御史事攝刑部尚書
今上御極奉 命辦理
世宗喪儀刑部即真協辦總理事務旋充律例館總裁
官大學士員缺

上念

先皇帝簡畀心膂大臣詳慎恭厚無有在公右者遂以
公正揆席授東閣大學士兼禮部尚書兼管刑部尚書
事務如故計公自安撫 內召以迄今位首尾四年廷

臣遭遇 恩渥起擢至速者以公爲最俄奉 命入直
南書房以總理事務議敘蒙 恩賞給雲騎尉世襲
駕謁

兩陵暨 幸海子 幸木蘭 幸盛京公皆扈蹕參帷
幄之謀先後 賜馬六匹又 敕每年於三庫飯銀內
賞銀二千兩又於 圓明園 賜第爲公休沐之地故
事大臣年逾七十得許紫禁城騎馬公年未六十痰疾
初可

聖心軫恤特賜騎馬入紫禁城蓋異數也四年加太子
太保五年 賜清德鎮俗扁一幅 賜詩一章六年管

理戶部尚書事務又命每年於三庫飯銀內加賞銀二千兩賜御衣烏雲豹裘一領內廷供奉諸臣不得與也八年扈蹕自盛京謁

祖陵歸舊疾舉發

聖心垂注賜醫調理尚方珍藥絡繹於道特遣侍衛

看視明年公奏請解退

溫旨慰留公求退益力始蒙俞允加太子太傅適公

子以烜晉官翰林院侍講學士公立命詣闕謝恩

卽賜名見垂詢公病狀甚悉

上親賦詩寵行并賜御用冠帽內府文綺貂皮令御

前侍衛賚

旨卽家宣諭

上幸南苑

車駕將親臨慰問公具疏懇辭始獲遂請瀕行

上復命內廷諸臣賡和御製詩韻賦贈彙寫成軸命侍衛賚至并賜茶果克食暨如意一枝傾朝祖送皆歎以爲千載一時之榮遇予告大臣例給半俸解任回籍者不得倖邀也

上特命給公全俸以資頤養公家居四載

上時加存問賜手敕一道賜詩三首日夕跂公還

朝而公每遣人賫摺請安賜福字荷包手帕食物
與在廷公卿同公雖身在江湖而瞻雲望闕之心無
日不縈寤寐末疾忽嬰遂以不起

上聞嗟悼彌日

特沛身後之恩給銀千兩經紀喪事命浙省撫臣卽
其家加祭一次恩賜一品祭葬晉贈少傅予謚文
穆恩綸稠疊光賁泉壤哀榮禮備海宇傳爲盛事嗚
呼公亦可以無憾矣公德性寬厚風度端凝動循禮則
溫溫不事表襮及發爲事業光明俊偉如青天白日有
目共睹急功近名一切羞道少承文敬公嚴訓門庭之

內肅若朝典友愛同氣白首無閒言與人交謙退如恐
不及後門寒峻咸被賓禮扶植善類提獎才俊出自性
生自開藩以至台鼎踐歷華廳家無半椽尺土之益節
衣縮食壹以敦宗睦族周恤窮隱爲計以急告或至影
質以濟之最公生平文教被於荒陬膏澤及於天下謀
謨之績炳于廟堂潔白之操協於輿誦反覆推論求其
一間而不得其亦可謂一代之完人也巳公少好學爲
文淳經孕史典質華重龍翔虎躍識者早覘爲國家景
慶詩篇音暢律諧絕去破碎險怪之習禁苑宸遊
屬車後乘公未嘗不與每奏一篇輒爲

聖心激賞有奏議文集若干卷藏於家公薨以乾隆十二年十一月二十六日距生康熙二十二年八月二十三日享年六十有五以今官積階至光祿大夫前後領三館總裁事凡五充文武殿試讀卷官三奉 旨閱會試迴避卷獲 賜奎章宸翰以及尚方珍異爲子孫世寶者不可殫紀娶嘉善曹氏吏部左侍郎曹公鑑倫第四女 誥封一品夫人有賢行公口不言有無而夫人治內政督諸子使專力於學子七人以烜雍正庚戌科進士詹事府詹事兼翰林院侍讀學士之煒正二品廕生先卒翼燕乾隆丙辰科舉人光祿寺署正出後公弟

杞荀龍河南永城縣知縣殿恩順天府治中先卒應衡襲雲騎尉履端國子監生女二人適霍邱縣教諭張弘浚 經筵講官兵部尚書梁詩正孫十三人紹堂乾隆甲子科舉人紹墉庠生紹基國子監生紹墀紹城紹均紹垣紹堅紹垣紹坡紹墮紹增紹域孫女三人乾隆十有五年二月之望葬公於茶坊嶺之原銘曰
鳳山奕奕漸江滔滔怒流穿脇激爲瀾濤震侔天聲力
翰洪化四游坱圠萬派東射誕鍾偉器爲國甫申吐符
崇嶽孕靈大辰國紀鴻伐世延令緒不肅性成玉規珠
矩珥筆金鎖橫經石渠爰灑化雨擁傳荒隅

帝哀遠毗屬公欽恤量移三吳有耻且谿湯湯南紀來
旬來宣俄把旄鉞駐皖公山或肆覘掠取人於澤連紘
截流盤踞窟穴公以計誘悉縛以來估帆高枕打鼓夜
開

帝懸南牀倚公蹇蹇浙有大獄

命公往讞建牙里閩人謂衣錦公秉淑問寃濫必審孰
爲鷗張干逆天常摔曳株繫徧于南疆渠魁旣殲辭絕
延蔓拔千纍囚出之陞岸迹公陰德匪以市惠爲
天子使廣

天子意春生而溫秋殺而肅蠢蠢庶頑義正仁育惟

帝曰咨汝作司空兼執邦憲時惟汝庸惟

帝曰咨汝作司寇敬法恤刑佐朕三又宏開丹地簡畀
股肱貽

今皇帝授冊延登經綸 聖化亭毒萬物治臻皞熙澤
逮窮髮綸扉優游方期共濟六沴閒作二豎爲厲嘉庸
旣疇 堯文屢賁望 闕神勞覲公再出天不慙遺卿
月西霄飾終禮備

皇衷嗟閔班劍有加便房早築鐙闈魚膏風號宰木公
其無憂公已有子厚德鴻猷焜煌 國史我慚後死圖
徽貞石更千百年撰考猶覈

進古堂文集卷四
三

其無受公也休于私處無煩掛款
國史奸漸益衣圖
皇天知國報險許世更五早榮
繼開魚膏風熱率木公
以西貢崎嶇難
期制 崇文風實望 關帳榮贈公再出天不憚散
皇帝對冊登登錄錄 聖外亭書萬壽
命皇帝對冊登登錄錄 聖外亭書萬壽
命皇帝對冊登登錄錄 聖外亭書萬壽

封光祿大夫 經筵講官太子少師協辦大學士
吏部尚書加一級歲進士授諸暨縣儒學訓導梁
公墓志銘 代

今上皇帝功恢無外大孝格
天廣推錫類之仁
諭內外臣工親老者皆許乞養以遂其烏鳥之私於時
冢宰協辦大學士錢唐梁公有父年八十矣首先陳請
為百僚倡
上為賦詩寵行袞衣循陔曲盡色養閱六載歲紀戊寅
封公以疾棄養甫屆卒哭 詔卽其喪次起公為大司

空時窆期未告也聞 命屏營乞瘞壙而後卽道旣蒙
俞可龜筮襲吉將以明年二月之望丙寅葬於葛嶺之
原而以德配凌夫人祔走使來京師乞銘斯舉也關公
出處之大端而忠孝之源裕焉不可以他故辭也按狀
君名文濂字次周一字蓮峰五十之字爲谿父梁系夏
陽而新里爲望在宋世遠祖自汴遷杭遂世籍錢唐代
有隱德至祖萬鍾考國儀以君次子貴累贈如其官君
少從凌進士紹焯學罷之以女女焉自其弱冠卽餼於
庠焯厲風發朋試於一黷輒壓其曹偶而屢踏省門卒
不一遇意欲周覽四海奇勝以自壯凌夫人杖拄內外

黽勉有無不以遺君門內之憂而君得益以縱其游屐
南浮沅湘西極關隴北入幽燕所過高陵大壑荒祠破
冢一切可喜可愕輪囷鬱怒無所宣洩一昌之於詩詩
日益工而境日益困倦而歸二嗣子皆毳毳露頭玉聞
詩問禮自相師友琢磨璋琮璜琥之器爲 國寶臣雲
雷經綸瀾滿六合而君爲而不有遊塵外之煙霞被天
邊之黻舄德協君宗道參憲乞 聖恩
今上皇帝承天理物十六年中而君三膺 錫命司空
官學士初以 登極恩得封朝議大夫暨貳司農
上念宣力年久 特予封資政大夫逮長天官入政府

晉封至光祿大夫凌夫人亦自恭人晉贈至一品夫人
乾隆十六年春 六飛南幸召見行幄賜非常之顏色
豐貂文綺充溢篋笥 天章宸翰輝映梁棟是時適君
八十初度 國恩家慶並集一時邦人榮觀傾動壘邑
洎二十有二年

聖主復修巡方之典君失明不能具朝儀

上眷注甚深賜司空詩猶有依然喬梓回來覲之語垂
詢近狀復書萊衣晝永四大字以 賜推恩優老禮絕
臣僕何其榮也方今大化周流海宇清謐韓子所謂千
載一時不可得之嘉會君以一老書生婆娑娛息乎其

間傳韋氏之一經敦司徒之三物遭時利見聲滿宙合
夸者詡爲福備達者歎其性全皆非所以測君也君一
門鼎盛常懷盈滿之懼 朝命及門冰淵愈惕飯不忘
君寢必省過每懷矢報逮至彌留大司空勵匪躬之節
雖其天性抑所以竟成君志也嗚呼卹之以南陔白華
之私雖六閔歲而不覺其淹隆之以股肱耳目之寄雖
甫卒哭而不可以爲迫一張一弛

聖主之使臣以禮也如此爲臣者宜何如欽承 休命
而猶懇懇以春秋窳窳之事爲請者執親之喪有限斷
報國之願無終極生事死葬之禮畢而後專心壹志於

公家而無他顧此純臣之心迹也君子表微余敢竊取斯義以論定君父子之間所謂志其大也他何志哉志官闕則君自貢于成均及年當司訓暨陽封大職卑格於令不得赴官志生卒則生以康熙紀號之十一年凡八十有七而卒為乾隆二十三年其月孟夏其日庚辰凌夫人後君一年而生先君二十四年而卒志子女君丈夫子三人長放心翰林院編修以待養不入館後君半年亦卒是謂死孝次詩正即今大司空皆凌夫人出筮以許孺人生季子夢善舉於鄉女子子四人國子生呂伊廣西遷江令包榕內閣學士張映辰其壻也凌夫

人出筮以楊孺人生季女尙幼孫男二人同書 日講

起居注官翰林院侍講敦書貴州銅仁守孫女三人一適副榜貢生范同治一字吳琰一未字曾孫二人玉繩履繩銘曰

孰為延登謀謨廟堂宏贊大猷勒勳太常

帝嘉乃庸咨汝作忠

帝章善教咨汝作孝番番國老年躋大耋一日之養三公不易

皇帝曰嘻朕不爾私食子收子聽爾有之是社稷臣倚若心膂暫解簪組徒以君故君其彊飭宜在子舍晨羞

夕膳侍奉優暇君今棄養宜還

人主俾敷經綸爲國霖雨今之司空古爲三公天成地平匪德莫克 璽書及門公在喪次如漢薛宣詔起視事人臣事君召不俟駕哀哀陳籲心繫厚夜

帝曰俞哉情不汝奪無俾後艱無慢無渴青山崿嶒元堂呀豁清風往來左林右葛埋幽之石巖谷照耀謨德考行具悉官號匪以官號奉揚 國恩垂裕後裔視此刻文

南陽府知府前翰林院編修任君墓志銘

君姓任氏諱應烈字武承一字處泉家世山陰自王父大廣爲杭贅壻遂籍錢唐考諱相潛德不耀生三子君其次也以後其伯兄君生而穎異爲文奧衍深曲善體物情旣冠試於有司冠其儕偶學使錄入郡庠旋食其米廩歲已酉舉於鄉明年成進士改庶常散館授編修充 一統志纂修官書成晉一級兩學院以人才薦出守河南之懷慶君精於心計民畏而吏不敢欺尤以振興人文爲已任於懷仁書院中拔其尤者數人親經指授莫不得氣以去風氣日上懷屬七邑幅員不廣而文

章爲豫省之冠孟縣爲韓昌黎故里其子孫向無博士君創議上大吏請於朝得蒙 俞允昌黎之後有五經博士實自君發之歲己未以本生父憂歸里服闋補南陽守南陽地廣民悍號稱難治未入境聞鄧州唐縣民偶乘糧貴糾匪搶奪卽於途次遣經歷密授方畧擒其渠魁餘釋不問一郡帖然北來巨盜李會來宛勾黨劫奪頻聞甚至有闔室被燬者懸重賞購之立置於法南陽之盜自此頓息上官廉其賢能諉以全省捕務雖隔屬聽其節制前此未有也宛偶被水災單騎省視廬舍有衝汨者概予修葺秋禾可補種者概給種粒向例賑

務必先請而後行君念宛距省六百餘里往返稽時則倒懸者無救先發而後聞災黎得霑實惠大吏不以爲專也豫藩趙城密奏請於河南南陽懷慶等郡開礦飭下該撫查議中丞轉檄各屬皆礙藩伯而持論唯阿君獨斷斷直抒所見畧云煤炭爲日用所必需而計利究不甚大趨之者諒不甚衆又腳價卽關成本採取入山必不甚深稽查嚴密自無聚衆藏奸之患若銀鉛等礦其爲物也本不脛而走其聚人也自不疾而速禁之且不能止况招之使來乎且豫省沃野千里非若滇粵等省山多地少本業不足謀生者可比卽如南陽一郡現

在務農之家大率人耕百畝此卽盡驅斯民而農之尚
覺地廣人稀田功鹵莽更分之使爲曠徒趨利逐末其
爲本業之拋荒必多矣前明萬歷中河南巡按姚思仁
條奏開採之弊有八現今形勢不必盡如所云而農桑
失業一條其流弊古今則一也條議內開滇省邊地可
開何以腹地轉多顧慮不思邊地僻處一隅遠方人諒
難涉險而至若腹內卽屬四通八達之衢其聚衆也較
易而河南居天下之中又逼近畿輔似更不宜輕爲嘗
試且銀鉛有無衰旺都不可知貪不可知之利役本業
之民而或至釀成意外之勢此固事之不得不爲鯁鯁

過慮者也中丞卽據此議覆奏事得寢計典膺卓異之
薦奉

旨回任候陞例晉按察使副使旋奉本生母諱居廬買
宅山陰道上宋陸務觀快閣遺跡在焉構傑閣三楹以
復舊觀課耕教子便有終焉之志越中後進皆從受業
合鄉先生之仕而已者仿香山洛社故事爲娛老之會
飲酒賦詩歌咏太平聞者艷之同年孫宮允願齋掌教
蕺山移家至越旋捐館舍遺孤才十一齡耳君首創買
田之議與娛老會諸公先後攸助延師課讀歲議給修
月議給米遺孤未冠卽列膠庠忘其羈旅之苦也君精

道古堂文集卷四十一
神矍鑠每來湖上健於登陟近得痰飲之症兩月中處
分未了之事手書寄余願以一言傳其身後飾巾待期
神明湛定竟以九月十六日不起時乾隆太歲在戊子
也生於康熙癸酉九月二十二日壽七十有六例授中
憲大夫配杜氏例贈恭人先卒子男子五長伊太學生
先卒次仁太學生皆恭人出造室以胡生傑會稽諸生
次倅次備子女子三乾隆戊午科舉人孫泗紹興府廩
生聞人葵太學生汪墀其壻也孫七法祖衍祖震祖纘
祖詠祖秉祖慰祖壽藏在會稽之儲墅君所自卜也臘
月六日庚申諸孤將穿杜恭人墓合葬復理遺命前來

乞銘銘曰

君之生也與吾爲文章道義之友及其沒也鄭重而申
久要之言平生風義宜哭寢門病躄躄而鑑井幸吾舌
之尙存件繫君之行事巫咸許我誅盪叫九閻木葉下
兮空山昏吹簫嗚咽開幽窀灼楚燁兮筮襲吉牂體合
兮安且敦完吾責於後死僖士友之討論

具奏 諭祭葬如例入祠加祭一壇 令翰林院立傳
啓殯之日復奉 恩旨所過沿途二十里內官弁並赴
舟次弔奠遣人護送哀榮禮備冠絕寮案公起自田間
受

兩朝不世之知遇回翔館閣出入 禁闈洊歷卿宰以
至延登受策 隆恩渥澤古罕倫比而筋力且就衰年
運不我與高厚之恩待酬於萬一報國之心積縈于寤
寐公雖死而目猶未瞑也葬有日矣隧道之銘孤子排
纘行事先期來請余與公同備 顧問參密勿朝夕繼
見垂三十載知公特深其忍不銘按狀公諱詩正字養

仲號薊林梁氏系出新里所考者善菴公積從宋室南
渡爲遷杭始祖著籍錢唐曾祖萬鍾祖國儀隱德不曜
皆以公貴 贈光祿大夫 經筵講官太子少師協辦
大學士吏部尙書曾祖母汪祖母施並贈一品夫人考
谿父公諱文濂歲貢生選授諸暨縣學訓導不就以公
貴累封如前母凌累贈至一品夫人公生有異稟五歲
始能言授以四五言詩畧上口卽能誦長擅文譽與兄
啓心有二難之目年三十始舉鄉試又五年成進士時
雍正八年庚戌也 殿試以一甲第三名及第授職編
修旋充一統志纂修官未散館出典山東鄉試爲正考

官明年癸丑充會試同考官又明年選入 上書房得侍

今上皇帝暨誠和兩親王講讀九月充 日講官起居注十月晉侍讀明年晉侍講學士凌太夫人病亟乞假遽歸驚聞

世宗憲皇帝賓天已擬東裝疾赴 梓宮哭臨先一日而凌太夫人卒督撫上聞 賞藩庫銀五百兩治喪未期年 詔起入直 南書房垂問塗次病瘡狀 賜御醫并參藥 諭令以素服入直照現任學士例給俸兼懋勤殿行走 賜外城第宅一區甫釋服補授侍讀學

士充 日講官起居注仍兼阿哥書房行走是冬充順天武鄉試正考官旋晉內閣學士兼禮部侍郎即日充經筵講官乾隆四年正月補授刑部右侍郎五月調戶部兼理錢法五年條奏旗丁事宜蒙 俞允十一月轉左謝錢法事六年谿父公年屆七十 恩給二品封典御製五言律詩 御書傳經介社四字以賜四月奉命仍兼錢法事務七月扈從木蘭十一月兼吏部右侍郎事是年充 皇清文穎館總裁官七年二月扈從恭謁

泰陵四月充 殿試讀卷官旋 命閱新進士朝考卷

是年兼 御書處行走八年七月
皇上親謁

祖陵駐蹕盛京公與扈從

上升殿大宴蒙 恩召赴榻前手賜一卮時與者不過
數人九年六月 賜書清勤堂三字扁額是冬扈從盤
山 宮門去內殿稍遠每遇宣喚 恩許乘騎而行重
葺翰林院落成 車駕臨幸 錫宴賦詩賞賚有差公
以侍郎 特恩照尚書品級優賜十年二月扈從謁
東陵五月補授戶部尚書奉 命閱新進士朝考卷七
月扈 駕幸多倫諾爾十有一年九月扈從謁

泰陵詣五臺十有二年六月充續文獻通考館總裁官
七月扈從木蘭十有三年正月扈 駕東巡謁 孔林
次祭嶽廟登泰岱

上以山徑險仄 諭公不必隨上沿嶺派侍衛分駐有
交辦事遞傳上下三月奉 命閱會試迴避卷四月調
補兵部尚書又 命閱新進士朝考卷九月扈從謁
泰陵金曾梗化大學士傅公奉 命經畧羽書旁午一
切臺站事宜資公調撥十有四年金川報捷 特加太
子少師十一月奉 旨暫管吏部尚書事 賜御書宣
贊樞衡四字扁額十二月兼翰林院掌院學士充 日

講官起居注旋 命協辦大學士事十五年正月補授
吏部尙書協辦閣務如故兼教習庶吉士八月扈 駕
時巡中洛謁
東西二陵以朱荃事奏對未協罷掌院學士職公經歷
四部遞長六官夙夜在公殫竭心力期盡職而後已其
佐司寇也盡心庶獄研精律例曹司有通曉刑法者虛
懷諮問獄無疑義奇請他比情罪允協暨筦中樞
上以經畧與大將軍向無區別 命公釐定章程公博
考前典參酌今制自禡祭啓行以至凱旋告廟條上儀
注載入會典及掌銓衡振淹滯抑躁進不徇請託不避

嫌謗官方澄叙胥吏歛手在農部最久清釐錢法稽核
經費懲各司奏銷之延閣綜直省正耗之盈虛精於心
計者不能及也

聖主倚毗旣深任寄尤篤明良一德朝野矚望揆席之
端兆於此矣十有六年 六飛南幸谿父公年臻大耋
公預請扈 蹕歸省 恩給一品封典 聖駕駐蹕杭
州越三日奉 命閱召試諸生卷 御製七言律詩以
賜並給假一月侍養 御書湖山養福四大字賜谿父
公台階愛日四大字賜公 天章下賁焜耀里閭假滿
還 朝從 幸木蘭恭逢

皇太后六十萬壽 覃恩頒詔封本身一品明年以谿
父公失明陳情乞養 御製五言律詩寵行有翻祝歸
朝晚卿家慶倍深之句

聖情肫篤不異家人父子家居二年奉 命與長洲沈
少宗伯德潛同修西湖志纂二十有二年 六飛重幸
江浙星赴淮陰接 駕 恩賜在家食俸時尙書汪由
敦假歸省墓 命公隨往江寧代攝其事 賜御製七
言律詩又 賜御書萊衣晝永四字扁額奉 命閱兩
江士子詩賦卷扈 蹕至金山行在
聖恩體恤 命歸省侍無何遭谿父公之變伯兄亦以

毀卒熒熒在疚獨營幽窆 特詔以工部尙書起用陳
情乞假數月畢葬事明年春就道復調署兵部尙書又
奉 旨於紫禁城內騎馬八月充順天鄉試正考官又
明年奉 命磨勘會試卷五月閱庶吉士散館卷卽奉
命教習庶吉士服闋實授兵部尙書十二月 命署掌
院事務兼續文獻通考館總裁官二十有六年二月扈
駕巡幸五臺四月 命磨勘會試中式卷旋充殿試讀
卷官復 命閱新進士朝考卷五月補授吏部尙書協
辦大學士仍兼掌院學士事又補充 經筵日講官起
居注是冬恭遇

皇太后七旬大慶敬接

徽號冊寶于 慈寧門奉襄典禮先後奉

懿旨并

上賞賚較廷臣有加二十有七年順天鄉試仍爲正考官二十有八年六月拜東閣大學士之命仍兼吏部尙書翰林院掌院學士事九月 賜內城第宅一區十月晉加太子太傅十一月以微疾遽薨遺疏不及上公天性孝友太夫人前逝諱辰及歲時饗祀輒嗚嗚作孺子泣侍谿父公色養倍至事伯兄飲食必偕弗敢先也弱弟爲谿父公晚年所舉子愛念尤篤俸餘贍給之外

分財產與之子姪並三族待以舉火者不能悉數也自入仕以至爰立不傍門戶不矜巧進天獨結

主知讒公者莫能入愛公者亦莫能助也薦剡人才封章慎密倖進之徒未由關說左右親近無從窺伺焉總裁各館鉅細皆謹手定去取精當詳要適職巨製鴻裁折服羣彥文章訓詞深厚辦香南豐詩骨蒼秀賡和明廷韶英繼響玉石均調遠播 皇風仰合 聖製爲宋元以來侍從之臣所不及臨池初學誠懸繼參文趙晚師顏李格凡三變奉 命編校秘殿珠林石渠寶笈二書益得縱觀 天府收儲詣力精專天情流美經進

時獨蒙 睿賞屢勒堅珉同列推爲第一公生康熙丁丑二月四日薨于乾隆癸未十一月十有四日壽六十有七初娶于孫繼以包累贈一品夫人再繼以徐以子官得贈如前公子二長同書乾隆十七年 恩賜進士日講官起居注翰林院侍講以後伯兒次敦書乾隆十二年舉人 恩賜一品廕生貴州遵義府知府女子子二長適舉人廣東清遠縣知縣范同治次適太學生吳琰兩子一女皆包夫人出一女徐夫人出孫男三長玉繩仁和縣學附生次履繩次應繩孫女一今以三十二年二月癸丑葬於邑南之象山三夫人祔焉銘曰

梁祖伯益以國爲氏公侯子孫必復其始顯允梁公早宅

帝衷甘盤舊學四輔道隆發聞詞垣遍歷華省四長六官文柄屢秉

天子幾暇典學不懈公爲益稷賡歌颺拜 萬乘巡游雅雅魚魚公爲臯朔常在屬車南浮江淮東登嵩泰瞻洛觀河經覽九塞公和其聲金舂玉應每奏一篇輒動清聽筆跡淵妙鳳泊鸞停琬琰深刻照耀 闕庭公佐唐虞以道自許爲世舟梁爲國風雨出入綸扉從容丹地朝夕論思不我遐棄公乘白雲仿側九閭景短心長

皇上鑒公無他僅予革職還其產之十三四爲其饘粥之地旋

命歸里恩膏汪濊旁觀皆爲感泣况其身受者乎公易直子良朴誠自矢爲

主上所深知橫遭宵小之玷縈紆趨問無由自白於聖人之前舟車刺促內鬱外勞抵家甫匝月疾作遂不可爲時乾隆三十三年五月二十三日也貧無以殮孤子鬻其餘田以給喪事某年月日葬於先人之阡苴杖麻經遠走千里踵余門而乞銘余與公同試詞科同官翰苑性情嗜好無一不合不獨文章學問之益也其忍

不銘齊之出有二太公之後子孫以國爲氏衛大夫齊子之後子孫以字爲氏此夾漈鄭氏之言也世遠不可考信公自撰年譜矜慎不敢妄定據其近代之可徵者曰先世汴之祥符人隨宋南渡僑寓杭州有諱盛者由進士官宣義郎始占籍天台是爲天台之始祖四世祖莊卿洪武初以人材薦授湖廣房縣知縣七世祖汪正統丙辰進士官兵部車駕司郎中扈蹕殉土木難曾祖父諱之仲早卒曾祖母許氏守節撫孤事載郡邑志從祀節孝祠祖諱化龍以潛德孝義聞於鄉祖母徐氏父諱轟字省齋邑文學母張氏自曾祖以下皆以公貴累

贈至資政大夫禮部右侍郎妣皆贈二品夫人公名名南字次風號瓊臺晚號息園省齋公生五子公其次也幼而穎敏六歲解屬對九歲五經成誦鄉里稱神童十二歲應郡試省齋公攜至郡登巾子山吟五言云江水連天白人烟滿地浮巾山山上眺一覽小東甌識者卽以公輔器相品目與兄周南出就外傳青燈布被攻苦連日夕弟圖南世南道南皆從公學友愛彌篤年十六充博士弟子二十三督學新城何端簡公世堪選拔入成均十一郡貢生咸集端簡指公稱於衆曰此我朝奇士當以王姚江一輩相待也雍正七年己酉科鄉試

中副車十一年癸丑 詔復詞科之制明年督臣上蔡程公元章學臣奉新帥公念祖以博學鴻詞薦乾隆丙辰 皇帝紀號之元載 召試之士羣萃 闕下凡百八十四人試於 保和殿 欽取一十五人君名在二等第八改翰林院庶吉士卽充 大清一統志纂修官明年散館授檢討三年四月京察一等加一級四年六月充武英殿校勘經史官十月充明鑑綱目館纂修官六年三月以一統志館議叙列一等加一級八年四月御試翰詹官於 圓明園列優等六月晉右春坊右中

允十一月轉左以原銜署日講起居注官春召對於
養心殿西煖閣旋晉翰林院侍讀以原銜充日講起
居注官九年丁省齋公艱戴星而奔哀毀骨立前曾承
辦禮記漢書考證十年武英殿經進十一年三
月綱目告成議敘仍列一等奉旨於起官日加一級服闋入都奉
上諭仍著在武英殿校勘經史十二年二月補原官
三月份經史館告成議敘加一級旋充大清會典纂脩
官四月京察一等署日講起居注官五月召對於

勤政殿校勘通志通考晉侍讀學士充續文獻通考館
纂修官主順天武鄉試以原銜充日講起居注官十
三年戊辰會試充同考官五月御試翰詹官於
上諭在阿哥書房行走以一等第一名擢授內閣學士
兼禮部侍郎甫一月補授禮部右侍郎上於寧古塔得古鏡以來歷未詳問朝臣莫有對者公
具悉原委并其欵識以對上大悅論左右曰是不媿博學鴻詞矣八月召對於
勤政殿越日復於養心殿西煖閣召對九月初五日

禮部於西苑樓前侍班伏觀 御射發十九矢皆中的
上騎還 圓明園顧尙書蔣溥與公曰不可無詩公於
翼日進詩四首序一篇

上卽俯和 命內監持稿示公知遇之隆罕有倫比旋
充續文獻通攷館副總裁官侍班暢春苑大西門樓奉
特旨勘定通禮十四年正月 召對於西煖閣四月充
冊封婉嬪副使二十九日自 圓明園直 上書房
歸澄懷園甫及門馬驚墮觸大石負重傷幾不藥程學
士景伊亦自 上書房歸驚馳入告 特遣中官就寓探問傳蒙古醫
上爲動容賜藥三瓶

療治病少定

上見 阿哥 果親王頻問汝師傅病勢如何須時差
人探問又見奏事大臣

天語垂問病狀後於木蘭圍場中又問阿哥九月回
鑾又問大學士尙書 賜乾鹿肉十五束
聖眷隆厚雖慈父母之於子無以加也十月病稍聞詣
官門請

聖安 召對於弘德殿行步猶艱
天顏惻閔曰汝病尚未愈須加意安養公因口陳懇解
職任回籍省侍老母

上慰留再三堅請益力

上言冬間風寒如何行路慰諭欵曲十一月具摺哀懇

俟春和由長船回南

上始可其奏猶傳太醫劉裕鐸邵正文診脈處方公單

門寒素起自田間不藉引援不由推轂荷

聖主特達之知論有根柢辭無枝葉肫誠朴茂溢於眉

宇望而知爲端人碩士晝日三接一歲九遷受寵若驚

奉身若不及

天鑒密微一誠相感蓋不獨以其學優而文贍也自通

籍以來

聖恩優渥錫賚便蕃不可勝紀其同詞科諸臣拜賜
者則日知薈說

御製喜雪石刻紗葛筆墨端硯其同翰苑諸臣拜賜

者則日講春秋樂善堂文集

世宗憲皇帝御製文集 欽定四書文

世宗憲皇帝上諭其同綱目館諸臣拜賜者則明史

其同翰詹諸臣優等拜賜者則

御製元宵聯句石刻紗葛筆墨其因考試而拜賜者

御製石刻硯墨筆等物其賜詞林典故則名對於

勤政殿也其同上書房行走諸臣拜賜者則

御書敬勝齋法帖貂挂龍箋對聯筆墨以及鹿肉大魚
山雞鹿尾挂麵藕粉葛粉荔枝蓮子青菓嘉慶子豐貂
文綺挂包手帕福字凡三 賜焉起程又賜紗葛各
二抵家太夫人適患痰喘臥牀第聞公至起謝
天恩執公手曰汝果來乎勿藥而愈十六年 翠華南
幸公恭迎於吳江八測河岸

上遙顧曰汝已好耶隨向 行在請

聖安卽 召見詢問病體及老母健飯否
諭以汝能奉母讀書自然復健汝第安養不必步步相
隨 賜克食并內緞二紫貂四十一月太夫人棄養明

年十月合葬考妣於三十一都苑坑之原十九年二月
服闋制府喀公請為紹興載山書院山長冬喀公復請
主福建道山書院以道遠辭巡撫周公聘主杭州敷文
書院二十二年

上復幸浙公於無錫北之迎龍橋迎 駕尙未奏名

上望見卽問汝今已好耶隨詣 大營盤請

聖安卽 召見垂問病勢加減及書院人文奏對良久
遵

諭先至杭

上駐蹕蘇州 命軍機處賜墨刻一卷內緞四疋二十

八日於西湖 行宮恭進頌冊蒙 賜大緞六疋二十
六年十月叩祝

皇太后萬壽入京恭請

聖安卽蒙 召對慰問良久內監扶起與尙書長洲沈
德潛奉

旨仍赴上書房與諸阿哥相見以詩文質正辰入未出
有扶掖者不拘常儀十一月二十五日朝賀

皇太后萬壽 賞內緞三疋挂包鼻烟又奉

旨加一級加賞彩緞三疋紫貂六個 皇清文穎一部
二十七年

皇上三幸浙江恭迎於吳江汪家溪亭上三十年

皇上四幸浙江恭迎於蘇州城內 行宮前俱蒙

溫旨慰問傳

諭先回靜候

皇上駐蹕西湖行宮疊受頒賞內緞越日 幸敷文書

院

御製詩疊韻

命公與學臣并諸生和詩進呈 賞筆墨硯公主敷文
凡十一年獎勵後進因材而篤生徒雲集中卷盈坐至
是以風痰時發懇辭歸里杜門不出方幸棲遲化日保

卒餘年不意逆人近出族屬橫遭波累壽命不長彌留
墜言自云我生不辰濱於死者有二皆賴
聖主得以生全方馬驚墮地時首觸巨石腦髓逆流目
睛眩轉神魂飛越自分必死非夫萬金良藥孰能使元
神固而不離非夫生牛冒首孰能使真氣聚而不洩非
夫蒙古神醫徧體椎朴孰能使十二經脈漸復其本初
三百六十五骨節各還其部位三日而知痛五日而知
飢不三月而卽能起立收旣散之魄體與陰陽爭瞬息
之去留而奪之鬼伯之手生我者父母之死而致生之
者

皇上也逆書上聞部議以狗隱擬流
聖意不測遠則新疆近則烏刺至近則寧古塔也朔風
砭骨黃沙蔽天朝狎駝馬夜鄰鬼魅羸軀殘喘填溝壑
而飽烏鳶其常也則今日考終牖下雖死猶幸齊氏子
孫生生世世宜如何其銜結以報也言不及家事泊然
而逝公口無擇言身無擇行弱不好弄而於詩書若翹
蘖著作等身石渠金鑑藏在廣內者一統志河南山東
江蘇安徽福建雲南六省皆其編輯外藩屬國徐韓向
無底本則公創稿新撰也明史綱目前紀二卷神光熹
三朝則公所輯也又與楊學士椿兼總校之任 武英

殿分撰經史考證而公獨多經則尙書禮記春秋三傳
史則史記功臣侯表五卷漢書百卷後漢書郡國志五
卷隋書律歷天文五卷舊唐書律歷天文二卷嘗言酈
氏之注水經明於西北而闇於東南且域外之水道未
詳因撰水道提綱三十卷大而河海小而溪澗溯源窮
委如指上螺紋一鑿可悉又有史漢功臣侯第考一卷
歷代帝王表十三卷後漢公卿表一卷宋史目錄皆其
藏于家者也詩文操筆立就鋪陳終始爛若雲錦晚喜
集句李杜韓蘇若出一手在葢山聽雲樓臨摹蘭亭法
帖卽於原序中去其複字二百四字做千文體成三言

詩十七章客有以淳化閣帖三百字求跋者卽因其字
數縱橫集之頃刻成五言律十二首讀余嶺南集卽集
七十餘首讀錢司寇香樹續集卽集十首贈之敏捷如
此公生於康熙四十二年正月十一日年不踰中壽止
六十有六云配張氏 誥封二品夫人子一式遷國子
監生女二長適張緝禮次適文學潘崙甲孫女二人銘
曰
赤城霞起翠屏雲蒸鍾毓神秀哲人以興繫公方聞詞
科發迹笙典珠墳紛綸旁魄蹈道執禮儒林職志三篋
補亡百題並試劉仲遼父心所遐慕七經釋疑兩漢刊

道古堂文集卷四十一
誤珠林玉府恣公遊處鴻筆馳驟爲國風雨慎簡
宮僚爲諸王友諫寓邪蒿敬徵醴酒吁嗟逢屯日昃退
直馬驚而墮命在漏刻巫咸叫闢
聖心閔惻賜藥遣醫奪之鬼伯移疾歸臥優游林泉咏
歌德化若將終焉族子猗猗不可化訓蒼蠅點壁幾隕
厥問
帝念微勤弗寘於理白衣還山祝宗祈死
鴻慈未酬沒而不瞑魂瞻帝鄉長在華頂松貞栢悅
幽扃孔臧母忘在莒一眚何傷碑材輪囷徐俟愍綸瘞
銘前和視此刻文

道古堂文集卷四十一

仁和 杭世駿 大宗撰

墓誌銘二

資政大夫內閣學士兼禮部侍郎徐公墓誌銘

國家開物成務喬木與世臣恒相經緯舜臣五人臯益
父子居其二粵若殷宗巫咸又王家周宣中興鄭桓公
武公相繼入爲卿士三代令辟敷心腹腎腸於寮案則
有公忠體國不貳心之臣咸有一德保世滋大由斯道
也我

朝嗣無疆大歷服重熙累洽雲龍風虎依日月之光

通古堂文集卷四十一
者恒有象賢之胄光昭朝列近而徵之鄉國錢唐徐氏其較著者也

聖祖仁皇帝時冢宰文敬公寅清亮直著聞清時太傅文穆公繼之

世宗憲皇帝時填撫安徽入掌邦憲未及枋用以詒今上皇帝延登受冊備位槐鼎霖雨天下麗鴻純嘏之氣芴礪鬱積篤生今侍郎潤亭宗伯胚胎前光介於兩輔非偶然也公諱以烜字養資號潤亭世家錢唐自曾祖以上贈如文敬文穆官詳二公碑誌中公生而穎異不苟言笑年十一卽列學官爲弟子學使者手其文以

示多士曰此徐冢宰孫也年雖稚而文境老成非私冢宰也肄業成均舉康熙庚子京兆鄉試雍正庚戌成進士改庶常習國書散館授編修旋充 武英殿纂修官入直 南薰殿

世宗升遐

今上皇帝卽阼時文穆總裁實錄而公爲纂修父子同在史局詞館以爲榮乾隆戊午同考順天鄉試明年會試復爲同考充 殿試收掌官晉國子監司業

實錄告成 恩賜筵宴表裏銀兩如例旋晉翰林院侍講文穆公在政府以痰疾舉發請解職是日公晉學士

詣宮門謝蒙

恩召入垂問文穆公病狀慰諭再三公叩首謝奉命
隨侍回籍甫一月文穆公促命赴闕待職都門久未
得補

特恩超授詹事府少詹事蓋異數也旋晉詹事與瀛臺
宴分韻賦柏梁體詩得水雲之榭臨滎澗句又命聯
句而公亦與焉奉文穆公諱居廬三歲大事克舉服闋
入都奉命賞送

三朝實錄至盛京珍貯旋補原官奉

旨進香北嶽恒山歸授內閣學士兼禮部侍郎視學畿

輔晉授禮部右侍郎尋轉左充經筵講官丙子主順

天武闈鄉試丁丑知禮闈貢舉以任學政時失察監生
邱允頂替錄科鑄一級特恩補授太常寺少卿而曹
太夫人訃至戴星而奔結廬墓側親監舂搗寢食交廢
嗚呼哀榮禮備公之事親終矣禮云終其身者非終父
母之身終其身也報國恩綿世澤公以此終無貳道
也

聖天子念文敬文穆勳在王室以公輔期公丹地深
嚴俾與二三元老出內絲綸試展其舟楫鹽梅之用服
甫闕卽有署理內閣學士之命復兼攝禮部事公以

進古堂文集卷四十一
重聽復患脾洩懇辭禮部雖得請而閣務殷繁冰淵時
惕隨幸木蘭歸卽疏乞休或惜其去或榮其歸皆非
公意也歸田後杜門却掃門無雜賓口不道錢刀足不
涉公府清風亮節爲鄉閭所矜式成周之制鄉先生仕
而已者例入右塾教其子弟當事欽公行誼以禮請爲
諸生之師青衿組帶之彥橫經問業非聖之書不敢觀
非法之言不敢道以居仁由義端其趨以研經味道勗
其學薰其德而德成材達者更僕不能數公居官以導
揚皇化爲職業居鄉又以扶樹士類爲事功趨庭退
學諸子皆能文章得氣以去者必使爲親民之官耕桑

禮樂化民而成俗紆九重宵旰之憂於萬一世篤忠
貞豈以一官一邑自弛惰哉此公每飯不忘之初心亦
卽文敬文穆翼子詒孫之家法也歲在辛卯正月二十
八日薨於里第春秋七十距其生辰甫半月而不及待
娶王氏戶部侍郎璣女贈二品夫人繼以俞編修元祺
女封二品夫人子七人紹堂乾隆甲子舉人江南涇縣
知縣降補湖北興國州州判紹墉四川雅州府經歷出
嗣公弟之煒紹基乾隆丙子舉人廣西東蘭州知州俸
滿推陞安慶府同知紹墀縣學生出嗣公弟應衡紹域
紹墳紹班皆國子監生孫七望麟鑑蘭慶驥禧孫女三

人曾孫二人世德世求公蘊寬中篤厚之德擅承明著作之才起家詞苑繼武玉堂敬敷五教以教國子惇庸典禮以佐春卿持節畿輔雲漢天章布壽考作人之雅化入爲太常揚類帝禋宗之大典馨香俎豆孚格人天敷歷清華無殊寒峻崇尚清靜似曹參孝謹似石慶惟肅惟栗似韋元成和於天倪不戕於物役不汨於勢利廻翔館閣遭際熙時以爲太平之幸人則誠幸人也以爲皇古之天民則誠天民也以爲鄉邦之碩宿則誠碩宿也某年月日孤紹堂等將於東山衙之原穿王俞二夫人之窆而合葬焉撰次行狀先來

乞銘銘曰

公稟精於淳曜兮潛蘊靈於川嶽託繼體於二勳兮紹庭聞而先覺騁皇衢而攬轡兮之帝所而聽樂邀玉府以婆娑兮議石渠而揚摧歷三監之清華兮集鳳池而飲啄叶聖瑞以歸昌兮媿鳴岐之鸞鷲典三禮於秩宗兮揚奉常之韶箛敷醲化於邦畿兮緯經天而有倬陳堯舜以賡颺兮誦墳典於講幄陪論思於丹地兮掌絲綸於黃閣晞韋平之世美兮匹前修之卓犖耳司聰而不順兮脾有神而被拯匪避賢以引身兮豈韜光而守樸匪泉石以心儀兮豈田園而志樂丹衷鬱而

未抒兮凜 聖恩之優渥矢孤忠以詒穀兮意磴磴而
堅確卒飾巾以待期兮登髻爪而洒濯灼荆雉以命龜
兮樂石壘而未斲撰銘詩以攷行兮遡流風而緬邈

刺諫殺以資興令而世典公 命以公世典公
令辭奉常之滯滯然 命以公世典公
治國也聖澤以範萬令 命以公世典公
以幾變公歸而 命以公世典公
公泉 命以公世典公
命以公世典公

文林郎行人司行人管理廣東電白縣知縣事顧
君墓志銘

君姓顧氏諱之珽字搢玉先世自上虞遷會稽再遷於
杭遂爲杭之仁和縣人高祖邦臣京兆倅曾祖諱命祖
大觀皆隱不仕考豹文順治乙未進士巡按湖北掌河
南道御史娶於虞繼娶於陳無子先以弟之子之璿之
璵爲後筵宮以汪氏乃舉君君生有異質年十一爲學
官弟子十四貢於成均二十二貢於禮部三試禮部不
得志就謁選人凡四宰劇縣以屯田塞外功當擢守當
擢員外郎皆不克就仍以縣令終其宰三原也縣令日

道古堂文集卷四十一
用例皆取給於民百里重繭交相委輸雖貧羸皆不得免君至首申其禁刻石著爲令民釋然若弛負擔當軍興時比邑繹騷原獨特君以安比去任一邑若失慈母號泣走送者殆數萬人繼宰石泉滿考晉行人旣得替時安西城工孔亟上官檄君往君體弱不耐劇資芥屢匱或阻君君毅然請行居絕域者三載躬親畚鍤城卒就敘功晉一級

天子廉其能思以劇邑展其用仍命管理廣東三水縣事而行人爲兼官三水爲兩廣要衝商舶烏集探丸之盜出沒其間君至跡知盜藪戮其會羣小稍稍遁去

建議於邑之蘆包口設立將弁以廣邏警萑苻爲之一空調繫海疆知電白縣事治行如前時中蜚語報罷旋得白然君自是亦不復有用世之志矣君修行於門內事母孝事兩兄及女兄弟極敬愛誦記數十萬言先友若毛檢討奇齡朱檢討彝尊吳徵君農祥皆魁儒碩學雄長一世君操柔翰隨其後煥爛有焯座爲之傾每治縣適歲大比必佐其主考官試士之雋茂者咸模索而得之晚登羅浮窮九疑上趙佗臺賦幾千百言東人讐焉旣歸里與里中三數耆老續南屏八社之集章逢之儒瓶拂之衲交進輻輳並遊其門務奇鬪險窮日累夕

至嚮宅以繼酒食而君不厭也乾隆乙丑八月二十七日忽遘末疾奄然隨化距君之初生蓋六十有八年而其降辰則在康熙戊午十月十有一日也娶沈氏封孺人博學鴻詞翰林院編修開平公女有賢行前卒子男子四人長正謙國學生次建節直隸雄縣丞次來泰次悅隨出繼舅氏子女子二人孫男三人曾孫男一人越歲丙寅正謙等將葬君於小鳳皇山之原以沈孺人祔幽宮伐石來乞予銘銘曰

艱厥遇以昌其詩奔走劇職亂不支淹數乃用薄宦羈攬束文藻將安施劉昞不作實錄移燉煌莽貫闕四維

手執鼙鼓鼓衆師金湯仡仡雄西陲不信視我豐功碑
炎徼轍跡來何遲登歷未經羅浮奇振翰欲合風雨離
浮湘南下窺九疑壓裝劣有秀句隨胡天中壽不慙遺
雕鉢肝腎理則宜藐諸噉然涕縷頤月朝卜日除反支
日廿加一丁吉時帷荒黼火魚躍池毀宗蠟行到水涯
令妻同穴盛禮儀漆鐙遠絕虬蜉窺乞我丹筆徵刻辭
昭在翠珉永勿隳

命喪回穴益顯精神激發誠地靈之丹其學為懷
日廿一卜吉執事滿火魚躍出與宗繼裕性水
難檢得聖訓宜勤精勉然則其時小日創文
學則南不富其銀聖楚之百表中斷斷天中
炎燭滿枕來吟發登祖朱絲羅碧香遊餘
手輝輝煌煌果明金樹外外外外外外外外外

翰林院庶吉士嚴君墓誌銘

君姓嚴氏名璫字十區先世自汴徙臨安遂為仁和人
曾祖大法祖模皆不仕考儀煌康熙壬午舉於鄉初娶
邵孺人生兄在昌繼朱孺人生君三歲而考見背朱孺
人教之學生有異稟覆九經如瀉瓶水羈卯為文動中
程度應縣童子試為選首已而學使者責君賂不應輒
擯不錄雍正甲辰乃用國子生名舉鄉試庚戌成進士
改庶吉士旋患瘰癧請急歸調疴里門時母夫人屆壽
五十方以節孝致綽楔之典築壽萱堂曲盡色養歲餘
疾少痊還京明年疾作卒於邸舍年僅三十有一蓋雍

正甲寅歲五月朔也同歲生倪侍御國璉周修撰霽梁侍讀詩正爲經紀其含斂奴子兆宗遞其棺以歸時兄在昌方攝江西萬載縣事不得行服母夫人將以歲乙卯之九月四日葬君於北山大方井之祖塋以君少嘗兄事予知君行誼爲悉因命爲誌墓之文君修門內之行居處幽室必自修整雖家人不見墮容與長老言捧手負劍唯恐不下然勇於爲義告之急不以亡爲解友人吳嘉丙貧病以死不克葬君爲誌其窀穸并刊其文傳之薄遊淮陰鍵戶日課經史爲文一洗懦鈍之習孛甲新意旬鍛月鍊冥搜不已至忘寢饋極意步天嘗疑

雍冀齊魯之墟與鶉首大梁降婁元枵之躔次多有不合著論以發丹元子之疑又謂筆迹之妙關於人品鮮發明之者集唐史能書人爲一卷他詩文多不存唯春草碧色賦有能誦之者君生於康熙甲申十月五日娶吳氏無子以兄在昌子震爲後銘曰

嚴維賢裔令德載光兩雛軒軒一覽一祥五采旣備德輝乃翔中道折翅爲孤鳳皇方井之陰龍虎回翰幽宮廣輪揆茨番闕輿藏馬反禮葬非渴誰歟刊銘慈母所揭

送古堂文集卷四十一
舍五月某日將葬于蘇州之某原先期來乞銘公之殮也吾不及視其窆也道阻且遠不得與於紼引之役余之負公也多矣嗚呼其忍弗銘君諱慶門字容駟一字渭川系出維揚明洪武時有諱貴者以軍功世襲千戶守官西安食屯地於盤屋遂家焉八傳至君王父召里公歲歉散粟常活數千人生子三人君考洛獻公其季也教君甚嚴期爲有用之學甫成進士從王徵君豐川遊明體達用盡傳其學以歸邑養偏親不謀祿仕母夫人王督過之始謁選人得廬江令奉母之官盡紬其平日所切究者次第施行之修文廟築廢城廣漏澤設義

田崇禮教以正喪祭置常平以煦寒餓其尤著者邑民止知平疇種稻高阜皆爲棄壤爲市牛具仿北地種植之法親督墾闢豐穰盈積利賴至今他若祝回風而蝗不爲災牒獄神而鬼不爲厲至誠所感君不以爲異也其攝無爲也無爲古濡須地沿江上下二百餘里大半當水之衝前人議築頭壩增至二三四壩盡沒於水居民危不可支君躬探深淺之處於鮑魚橋鱗魚嘴二處役夫千人樹柳椿編竹束葦填土爲斜坡形又取近山亂石填擲水中水渟沙淤久而成洲不獨民免墊溺而含和巢廬數州亦安堵無患矣其攝六安也州舊有水

塘環塘之田皆資灌溉議者欲盡地力謀墾塘以爲田
塘廢則田荒州人病之時君適歸廬江父老數百人涕
泣奔走請命於君君焦思擘畫開陳利害力言於上官
得止旋晉牧亳州俗好羣鬪倚州役爲爪牙張威扇燄
闕如虓虎禽治其魁獍役多至七百餘人悉杖而遣之
而悍俗爲之一變俗好訐訟牒訴山積君行古鄉約之
法使之宣導百姓排難解紛日坐廳事自辰至酉處結
者無慮三數十案不數月積牘頓清澆風亦息州舊隸
鳳陽幅員千里濱湖窪下久雨則湖溢遇旱則蝗蝻肆
生君相度地形用秦中收淀之犁法加以挑濬地下者

漸高水之淳蓄漸歸其宿一勞永逸農穫有秋旣而母
夫人棄養哀毀骨立戴星而奔葬母後便有終焉之志
皇上龍飛之元年以大臣薦補達州知州州環萬山歲
常苦旱爲搆旱稻之種教民樹藝始無艱食之憂州鄰
巴郡桑柘甚饒君買桑徧植教以分繭繅絲之法蠶利
遂與巴郡畧等川東流民日多官廩不能徧給腴田半
爲緇流隱占君悉釐定爲義產以贍之所活無算於治
西建宣漢書院禮聘名師指授文法文教漸興科第鵲
起其治悉如在廬江時道大力充所在奏績然猶未竟
其所施也未老懸車以病乞歸著仕學一貫錄教二子

以省刑勤政之道往來蘇杭二郡二子凜白華潔白之
養所以娛適君者無不至寒疾忽嬰奄然順化春秋八
十有一君力行勇而耆學勤遇家忌必素衣藉蓐悲形
於色以急告不以亡爲解隆親急故蓋其天性而利濟
之見于當官者則湛深經術設誠致行與君進退相終
始嗚呼可不謂之儒吏矣乎君娶于何繼以劉繼以騫
並以子焱貴誥贈宜人焱江南蘇州府同知燮浙江
嘉松運判女六李惺王璠王景文靳維昌李本立楊本
仁其壻也孫三人廷實廷憲廷棟銘曰不
不善爲吏吏而商容頭過身心甚長操刀使割母乃傷

不善爲儒儒亦俗其行姝姝欲逐逐辟以方輪轉長轂
吁嗟陳公今純儒胸有太平經國書舍之則卷用則舒
盤錯屢試屢效績廬江巴江共流澤治行吳公書第一
生當立祠沒配社未老收身世蓋寡治譜猶爲世傳寫
紹聞有後心魂恬食子收子能相兼禮不反葬夫何嫌
青山迤屨元宮夷斲石考行無溢辭繩兮蟄兮孫子宜

青山巖風衣冠不化
 諸國休將心腹
 當立麻對酒
 結異效
 今蘇
 衣谷其

汀州府同知汪君墓誌銘

君名郊字浚臣號南野姓汪氏先世自休寧來家於湖
 遂為歸安人曾祖考諱以澄刑部陝西司郎中祖考諱
 文樸太學生考諱亮采戶部河南司員外郎君讀書目
 數行下搜抉幽隱辨析端委將以為世用而屢躋舉屋
 不得志以薦起家莆田令莆俗豪梗難治君隨俗為張
 弛威惠並洽風潮陡作沿海田畝盡沒君首施數百緡
 募人重建李長者隄民得無患輕詵少年藏匿山谷聚
 兵械習技角力眾至數百或以告將弁請發兵往捕君
 方病寒嗽取方寸紙書數字召其族長老長老震恐率

其子弟捆束槍梃扶服階下叩頭謝死罪君悉焚其兵
縱遣之上官廉其能調繁侯官邑蒞省會認詞不復暇
君益自淬厲遇事勇爲劾及他郡邑有疑獄輒來讞民
以爲神君晉汀州同知攝守事攝漳州南勝同知攝福
清場務其治一如莆田時治狀爲八閩第一
天子廉其能將畀以方面之任登進有機而戶部君以
病膈終於家訃聞君捨地欲絕戴星奔喪慮建溪迂曲
不易達間道走鄱陽湖風迅濤駭舟幾覆者再僅而獲
免憂危震撼痛定思痛而君不起之疾實始中此抵家
不數月竟以毀卒年僅四十有三時乾隆六年十二月

二十八日也娶于黃有子男子三人曰啟瑞太學生曰
啟璠曰啟琰有子女子二人一字金可奎君生長華廬
而勤學逾寒峻工詩善書騰躍藝苑施於有政卓卓可
紀若此以是知其學之有本也某年月日孤子將葬君
於某原友人仁和宋振業次君行事爲傳簡而核不虛
美以予與君交久且善宋君介以請銘銘曰
所居理不自喜善張弛官屢徙止乎此其命也已琢幽
珉徵惇史君有子

道古堂文集卷四十一
者是也親經指授文有家法弱冠占金山衛籍爲博士
弟子旋改萊陽繼貞毅不忘故鄉之志一試卽冠其曹
餼其米廩循例入太學應京兆試俛得復失以能書錄
入一統志館書成議敘州同非本志也筮仕廣西太平
府之思州思州南界銅村爲交人入貢孔道君豐其贍
給而猺民無供頓之擾夷情丕變一洗其跳刀走戟之
習逮遷秩攀轅泣送數十里不絕前後攝思陵上思
三州事思陵訟案塵積蛇蟠蚓結不可爬梳色聽辭聽
君以一月了之上思有客於他省同里某知其金多僞
約俱歸戕之於中途投其尸於水子訟於官但云父爲

人所殺而不得主名君偵知某故市井無賴歸自遠方
驟致千金驗其年月與死者歸時合令人以好語致之
旣至君熟視之曰此殺人賊也某目動色變嚴詰之遂
吐實竟置於法一境以爲神君郡守白其事于上官將
列薦剡適部推山西朔平府通守遂寢朔平治寧遠鎮
旗民雜處繁劇號難治君壹以忠信慈惠臨之不恃几
案之才氓庶傾心吏胥斂手學優則仕之效也會裁缺
改銓湖北施南檄修江防親行相度帑節而工固心計
精詳是時君年已七十餘矣移疾請告大府雅相器重
固畱不得遂歸亡何長嗣不祿次子晟官比部迎養京

師惓惓先人祠墓不數月卽旋里越明年飾巾待期考終牖下春秋八十有二時乾隆三十五年十二月六日也娶畢氏封安人有淑行君在京師而贈公棄養附於身者勿之有悔赤手摺柱使君無終天之恨慮姜氏之在吳者嗣續不廣爲君多置妾侍其識大體若此乾隆十有九年二月十九日疾終上思官解子三人世昌元和縣附監生晟乾隆丙戌進士刑部江西司郎中世旭則側室王氏出也女三人王友信陸興祖何福綏其壻也孫三人宗發宗達宗魯孫女四人曾孫一人紹烈君天性純摯承貞毅之風篤門內之治贈公歿遺有幼子

飲食教誨以至授室視已子有加語畢安人曰吾寧薄于子弟不可不厚也女弟適申文定公元孫隨任雲南而卒不克歸葬募人行萬里遞其棺以歸萊陽有田數十頃貞毅所遺爲君應得之產君歸籍族人以其田來歸君勿受仍推爲祭田宦歸盡出俸金以脩祠墓卹族黨之貧乏者居甥館畢氏奩具甚盛外家中落以服珥悉歸之俾外舅遄反浙西故里有三喪未舉春秋窳窳之事旣固且安皆君力也晟將以某年月日祔葬君夫婦於長洲縣九都制字圩祖塋之次來杭乞銘安人本錢唐邵氏父楷諸生少鞠於舅氏愛逾已出不忍忘也

故氏畢銘曰

君所承者忠盡丕基逮君而顯將大厥施一經相嬭仕
非華資擦刀使割疑獄斧斯優游半刺迨於崦嵫嘉偶
作述淑慎爾儀齊牢合食同穴奚疑武邱之陽松檟蔚
而貞石挺挺埋幽有辭謂我悼史言絕讐欺石有時泐
銘不可移

天台縣教諭江君墓誌銘

君諱作楫字汝舟號警堂姓江氏系出濟陽之考城當
梁世金紫光祿大夫淹出爲宣城刺史子孫遂家宣城
再遷旌德三遷至歙遂爲歙北之豐瑞里人曾祖考某
祖考某考某隱德不耀君穎悟異常兒甫就傅誦數萬
言已能效世俗所爲詩古文辭未弱冠寄籍浙江之金
華爲學官弟子旋餼其米廩之粟歲癸巳
聖祖仁皇帝萬壽造賦近萬言欲獻之不果戰藝屢屈
而爲文益銳將貢成均矣會

世宗憲皇帝踐歷 詔開特科君適領鄉薦主司奇其

道古堂文集卷四十一
二十
文擬置第一數日更第九君聞之不憾也試禮部復不
得意乃求爲教職之天台造士有法士多樂就之比去
走送數十里外繹繹不絕君生有賢哲之資修行乎門
內與同產無閒言弱弟早死哭之以詩謔諷不已過時
而猶悲撫其孥恩禮備至久之忘其爲惇嫠也與物無
競諍罵之聲終身不挂於齒頰以急告視家所贏卽推
與不以德自矜春秋六十有四以某月日考終牖下時
雍正歲在甲寅也娶某氏有子男子四人皆爲儒長咸
寧乾隆戊午舉人將以某月日葬君子虎形山之原來
乞銘銘曰

先生之行誼備於詩白華常棣何施不宜嗚呼知匪難
行之孔艱徵銘久久用警庶頑

